

*Il lader
an quant
bianch
commedia in 3 atti
di F. Garelli*

112

PROPRIETÀ di
RINETTI FORTUNATO

Via Berthollet N. 16
TORINO


BIBLIOTECA

I LADER AN GUANT BIANCH

COMMEDIA IN 3 ATTI

DI FEDERICO GARELLI

Rappresentata per la prima volta la sera del 15 novembre 1860,
al Teatro Rossini di Torino, dalla comica Compagnia piemontese
diretta e condotta dall'attore Giovanni Toselli.

PROPRIETÀ di
RINETTI FORTUNATO

Via Berthollet N. 16
TORINO

PERSONAGGI

Monssù MERLATI. —————

GIOACHIN, student }
ANGÈLINA } so fieui.

Monssù GATIN, impiegato. —————

ALFREDO DÈSBÈLA, proprietari.

Monssù FAUSÈTTA. —————

BRONSOGNA, ciavatin. —————

GHITIN, serva 'd Monssù Merlati.

GIOAN, domesti 'd Monssù Dèsbèla.

PROPRIETÀ di

PINETTI FORTUNATO

Via Berthollet N. 16

TORINO

L'azione ha luogo in Torino: i due primi atti nel mese di novembre 1858, il terzo in luglio del 1859.

ATTO PRIMO

Camera modestamente arredata in casa Merlati. Tavola rotonda nel mezzo, canapè a destra, caminetto a sinistra. Porta comune al fondo; a sinistra porta delle camere di Monssù Merlati e di Gioachin; a destra porta della camera di Angelina.

Scena Prima

GHITIN sta pettinando ANGELINA
seduta presso il caminetto.

ANG. Ahi!... ahi!... Fa 'n po pi adasi. 'Tm strassi tuti i cavei.

GHIT. I fass pi pian ch'i peuss, ma a son tanto ancuti, che 'l pento a veul pi gnanca passè. A l'è da doi dì ch'i la penteño pi nen.

ANG. It vèdi ben, i l'ai mai 'n moment 'd temp. Da tre ani a sta part, che mia povra maman a l'è morta, am toca a mi fe tute le facende 'd ca. Me papà a l'è sempre a l'ufissi, me fratel a scola, e mi devo pensè a tut.

GHIT. Brava chila! E mi fassne niente?...

ANG. Oh! pèr ti: a l'è mach vint dì ch'it ses sì. I dio pa ch'it travaj nen, ma, it capissi, da fe ai na jè pèr tute doe, e ai na vanssa ancora.

GHT. Veulla ch'ii fassa la tērssa an quat?

ANG. Famla an eut. Sasto nen?

GHT. Peuss provè, ma i l'ai paura dē sbaliela. Son 'na pentnoira da bon pat. A me pais, a Cumiaña, le tērsse an quat a son già 'd lusso; a son mach le marioire ch'ai porto. Ansilà ass penteño 'na volta a la festa, e a resto seculie tuta la smaña, ch'a l'è 'n piasì.

ANG. I sai nen com a fasso. Mi tre o quatr ore dop i son già tuta dēspenrà.

GHT. Veurla butè la pomada ch'a dovro a me pais con coula ch'a dovra chila?...

ANG. Che pomada ch'a dovro?

GHT. L'acqua dël pouss o dla doira. Coula pomada li a 'ngrassa nen, a cousta poch, e ass na treuva dapèrtut.

ANG. (*ridendo*) Oh! i capisso adess. A l'è pèr lon ch'it ses 'na pentnoira tant famosa!

GHT. Eh! là. I fass lon ch'i peuss. Eco, a l'è bel e rangià. Stamatin i l'ai butaje tuta la mia sienssa. Ch'a vada 'n poch a goardè s'a va ben.

ANG. (*si alza e va a guardarsi allo specchio, che si trova al di sopra del caminetto*) Sì, sì, tant a va. Sta pentnura am sta gnanca mal, neh?

GHT. Ai va benissim. (*sorridendo con malizia*) E peui, basta ch'ai piasa a Monssù Gatin.

ANG. Che gofarie! Cos am na falo a mi 'd Monssù Gatin?...

GHT. (*come sopra*) I l'ai tocala ant 'l viv!

ANG. (*stizzita*) Finissla là! Dis gnuñe strambalade.

L'ai d'autr da pensè. (*sospirando*) Oh! sì, sì.

GHI. Vëdla nen ch'a sospira ch'a smia 'n mantes?

ANG. I sospiro, i sospiro përchè i l'ai i me motiv.
Guardoma!... L'avraïne da contè i me afè a tut
'l mond?... Secme pi nen, e va a dè ardriss
a la ca.

GHI. Ch'am scusa: a m'smia ch'a dovria nen stra-
passeme përlon.

ANG. Oh! va là, ch'it saras pa piatla.

GHI. Ai veul autr, mia cara tota, a l'è niente loli.
I son già usà, le strapassure ii patisso papi.
La prima padrona ch'i l'ai fait, quand i son
vnua a Turin a serve, fora 'd gaveme la pel,
dël rest a l'a famne e dimne 'd tuti i color.
Am cambiava nom sent volte ant un'ora.

ANG. Oh! n'otra?

GHI. E che nom! Un pi bel che l'autr.... 'D volte
peui, nen contenta 'd loli, am tirava fiña i pia t
apress.

ANG. 'T ses vëdutla bruta, donqué?

GHI. I peuss assicurela, che l'amprendissage a l'a
famlo fè an regola coula diao 'd 'na vidoa. Già,
a bsogna dilo, j era 'na gnocassa ch'i capia
mai niente; a bsognava ch'am dieisso le cose
des volte, e peui i fasia ancora sempre a l'in-
contrari. S'a fussa adess! Oh! adess me cont
i comensso a saveilo.

ANG. A l'ero dunque da compati s'at criavo.

GHIT. Fin a 'na mira a l'avio pa gnanca tort. Infatti a forssa 'd pasienssa e 'd piat rot, i son staita ant coula ca quasi doi ani.

ANG. 'T sesto peui andaita via ti, o l'anne mandate?

GHIT. Oh! s' a saveissa... Coula bonanima 'd mia padroña a l'era tanto mata...

ANG. Come?... bonanima... A l'elo morta?

GHIT. Un an e mes fa. L'ai savulo da la creada ch' a jera anlora con mi. Ch' a goarda: a l'era tanto furiosa, ch' a m' a gnanca pi lassame di mia rason. A l' a fait portè bel e chila 'l me baul sul repian; quant a mi, i sai gnanca pi s' a l' abia portame o campame, pèrchè vist non vist son trovame fora 'd ca, senssa padron e senssa scarpe.

ANG. Couma? Senssa scarpe?...

GHIT. Diascne!... A l' a gnanca dame temp ch' ii buteissa. I era an pantofle.

ANG. Bsogna ch' i t' abii faine quaicheduña bin grossa!

GHIT. Oh! n' altra? Niente d' autut. A l' a pa mandame via pèrchè ch' i l' abia fait, ma pèrchè ch' i l' ai lassà fe.

ANG. Lassà fe?... Cosa?

GHIT. Li dirai: essend così maltratà tut 'l dì da la padroña, tante volte i piorava; j avia sempre j eui ross. 'L padron... 'l fieul...

ANG. A l' avia deo 'n fieul?

GHIT. Un giovnot, 'na masnà 'd disdeut ani.

ANG. Disdeut ani? E 't lo ciami 'na masnà ti?

GHIT. Sicura: pèrchè a l'era 'n marajon pien 'd bon cheur vers mi. Vèdendme a piorè, a sagrineme parei, a tirava a feme passè 'l magon (*chinando la testa*) con quaich basin.

ANG. (*severa*) Ah! Ghitin, i saria mai chërdume 'na cosa paria.

GHIT. Oh! là. Finalment a l'era peui mach pèr consoleme.

ANG. (*come sopra*) A cessava nen d'esse mal.

GHIT. E ben, mi j assicuro, son mai chërdume loli. Tornand al discors, coula matin ch'ii disia...

ANG. Quala matin?

GHIT. La matin ch'a l'a mandame. J'era sla porta con doe sie pèr andè a tirè d'eva, 'l padron a intrava giusta ant 'l ponto ch'i stasia pèr seurte, e senssa dime nè un nè doi, a l'a 'mbrasame e basame.

ANG. E ti pèrchè l'asto nen tnulo andarè?

GHIT. (*ingenuamente*) I podia pa: i l'avìa 'na sia pèr man. Ant coul moment Madama a l'a ciapame, e causa soa, mi povra fia l'ai portane la peña. Chiel, bel e grand com a l'era, a s'è piasse doi sgiaffon, e mi a l'è capitame la farsa ch'i l'ai contaje.

ANG. A l'a fait tanto ben a tratète parei, pèrchè i t'agii nen da fia onesta. Anssi, da coust moment i t'averto: piite ben goarda a fene 'na mesa 'd coul gener, pèrchè i saria bel e mi la prima a di a papà ch'at mandeissa.

GHIT. (Che tota sufistica!) A coul rignard, ch'am scusa, a bsogna compati pèr esse compatie.

ANG. Cosa vorièsto di con lon?

GHIT. Niente ch'a peussa ofendla. Intendia 'd di, ch'a voreisse ben a l'è peui nen un delit, e che coula li a l'è 'na maladia, che poch o pro ant coust mond a la taco tuti.

ANG. A l'è sempre 'na colpa, se un peul nen sperè d'otni la man dla pèrsoña con la qual a s'a 'd relassion.

GHIT. Oh! si. Fa bel di chila! Donque noi autre povre diao, i dovrio fe le monie pèr tuta la vita? I bonom rich ch'a veujo sposene pèr 'l piassi d'ancariesse a mantnine, a son ben rair; ass trata mach sempre 'd combinè la fam con la sè; e, a die la vrità, pèr andè a muri an mes ai crussi, a l'è mei stè da mariè.

ANG. E dis 'n poch: l'asto mai pi vèdulo coul sgnor?

GHIT. L'ai incontralo dontrè volte pèr li, ma chiel a l'a tirà da 'na part, e mi da l'autra. Son acor-sume però ch'am goardava 'd bon eui.

ANG. Ma i t'as mai parlaje?

GHIT. Una matin a l'è smiame ch'a l'aveissa veuja 'd parleme, ma a s'è nen ancalasse. A sarà vèrgognasse 'd mia scufia pèr travers, dël me sall strassà, e dla sporta ch'i l'avìa al brass, pieña 'd còi e 'd patate. Figuromsse! un liòn parei 'd chiel-li!

ANG. Falo 'l bulo?

GHIT. Veulla nen? So pare e soa mare a l'an lassalo sgnor.

ANG. Com ass ciamlo?

GHIT. Monssù Dësbèla.

ANG. (*con un grido involontario*) Couma?... Cosa ch'it dii?... Alfredo!

GHIT. Alfredo, sisgnora. A lo conoss, dunque?

ANG. (*cercando di nascondere il suo turbamento*) Si, l'ai sentilo a nominè. (Chiel!)

GHIT. (*accorgendosi dello stato di Angelina*) Tota, cosa ch'a l'a? Ass sentla nen ben?

ANG. A l'è niente, a l'è niente. Son vnua 'n poch lorda. Va, va an cusiña; a l'è tard, a son ondes ore a momenti.

GHIT. Veulla ch'ii fassa 'na tassa 'd canamia?

ANG. (*bruscamente*) I l'ai bsogn 'd niente, it dio... Vatne, fame 'l piasì.

GHIT. (A m'a l'aria 'd gireje!) I vad, i vad. Ch'ass irita nen. Oh! mi povra fia. Adess ch'im arcorde, i l'ai ancora 'l bui da scumè. (*via dalla comune*).

Scena Seconda

ANGELINA sola.

ANG. Coula fia li am conven nen. Ant nostra ca i veui nen 'd serve 'd coul gener. Dop vint di, stamatin finalment a s'è dasse a conosse. E

Alfredo?... Alfredo che mi stimo tant, ch'i amo d'un amor tanto pur, tanto sincer, ch'im figurava così onest, così riservà, a l'è dunque compagn 'd tuti j autri?... Am tradiss pèr 'na serva, pèr 'na pèrsoña senssa prinsipi e senssa educassion? (*passeggiando*) Oh! 'l dèspiasi a l'è trop gross! Veui scrivie, rimproverejè soa cattività condota e abandonelo pèr sempre. (*va a sedersi a un tavolino al fondo per scrivere*).

Scena Terza

GIOACHIN dalla sinistra, e detta.

GIOA. (*fumando un sigaro*) Ohè! Cosa fomne? Seve mort o viv, stamatin? A l'elo ancora nen ora 'd disnè?

ANG. (*occupata a scrivere*) A son mach ondes ore.

GIOA. (*siede presso al fuoco*) Papà a l'è pa 'ncora vnù da l'ufissi?

ANG. (*come sopra*) No.

GIOA. A la matin dla festa ass fërma sempre pi poch.

ANG. Da fe ai na manca mai.

GIOA. Cosa fasto? Scrivèsto la nota dla speisa?

ANG. (*come sopra*) Sì.

GIOA. Che diascne l'asto stamatin? It parli tut a sciancon. (*si alza e si avvicina ad Angelina*) Lassa 'n po ch'i vèda lon ch'i t'as fait comprè 'd bon pèr disnè.

ANG. (*nasconde in fretta la lettera*) Veui giusta nen

ch'it vèdi. Brut nojos, va! I peuss mai stè tranquila 'na minuta.

GIOA. Goarda, goarda, che ton a l'a butà chila sì da dop ch'a manègia 'l cassul! Ass peul gnanca pi durvisse boca.

ANG. (*si alza*) It farii mei a 'ndè a studiè to tratato.

GIOA. L'ai studià fin adess.

ANG. T'avras durmi, com a l'è to solit.

GIOA. A l'è pa colpa mia. Cosa veusto mai? I liber 'd legal am fan l'efet dle pilole d'opio e dla conserva dla Certosa 'd Colegn. I peuss nen stè mes'ora sël tratato con jèui duvert.

ANG. Se a la seira tē vneissi a ca 'n po pi 'd bonora, i t'avrii nen sempre la seugn ch'at tormenta. (*in tono ironico*) A s'è piasse 'n bel andi, Monssù: fiña a ondes ore, mesaneuit, a ven nen a ca a cogesse, e peui ancora dēstorband coui ch' a deurmo. Papà a veul gavete la pover, va là!

GIOA. I studio tut 'l dì, a l'è dco giust ch'im pia 'n po 'd divertiment a la seira.

ANG. L'ai ancora paura che, con coula scusa, 'd bele volte it vadi gnanca a scola.

GIOA. No, no, schissa i la fass mai. A conven nen fesse fè cavajer tuti i dì.

ANG. Che cavajer?

GIOA. Natural. S'i mancoma da scola iss guadagnoma 'n crosin; e loli, mia cara, a fioco senssa remission. Ai na jè 'd coui ant me cors tanto

carià 'd decorassion, che se le cros a valeisso, a meritrio d'esse ministr, o quanto meno governator con cinquanta mila lire 'd rapresentansa.

ANG. T'as sempre veuja 'd rie ti.

GIOA. Veusto ch'i piora? A mia età a l'è pa natural.

ANG. Dël resto, pensa che se quaich volta it fass d'osservassion, a l'è pèr to ben. It lo sas, da tre ani che povra maman a l'è morta, l'ai dovù piè mi 'l manegg dle facende 'd ca, pensè a tut, cudi tut, ardrisseve e tnive polid, Papà, povr om, a va a so ufissi da la matin a la seira, a sgaira nen un sold pèr fene stè ben, pèr ch'an manca niente, e i peusso fe bela figura. Corispondoma dunque an ben ai sacrificissi ch'a fa.

GIOA. Eh! là. Da vive modestament i n'avoma... Antramentre mi pio la laurea, im fico ant 'l foro, e i vad ananss fin ch'i peuss. Guarda: i l'ai bonà idea dè vni quaicosa 'd gross. 'D ciancia am na manca nen, im buto a fe l'avocat patrocinant, e i guadagno i marenghe a palà. 'D canaja da difende ai na jè sempre; basta ch'i peussa andrissela 'na volta, e fe seurte assolt quaich birbant ch'a l'abia massane 'na mesa doseña, i son sicur 'd feme 'n nom immortal. Che piàs! che fortuna a sarà pèr mi coul di ch'i podrai marcè gonfi, con tant 'd crovata, e sentime a susionè a jorie: ch'a guardo, ch'a guardo: coul giovnot lì a l'è l'avocat Merlati,

una tēstassa! un spiriton! A l'avù tanta abilità e tanta sienssa da fe seurte d'an pèrson e mandè assolt coui doi, pèr esempi, ch'a l'an fait muri soe masnà a pcit feù, con ogni sort 'd crudeltà. Che sodisfassion a senti coule parole! Podeisse di: an grassia mia, an grassia 'd mia ciancia, la società a l'a riacquistà coui bei capitai, coui ornament ch'a l'era quasi pèr perde!... Coul è 'n trionf s'i a riveissa a fene uña paria!

ANG. Studia mach, e peui sta sicur ch'at manerà nen 'd cause giuste e sante da difende. Ma antrant coul di a l'è ancora lontan. Pèr adess a bsogna ch'i penso a secondè nost bon pare, a tni da cont coul poch ch'i l'avoma; e ti pèr 'l prim it dovrii fe a meno d'andè tute le seire a sgairè i dnè al Teatro o al Cafè.

GIOA. Oh! Signor. Cosa chērdēsto ch'i sgaira? I vad al Cafè pèr lese i giornai, e di quand in quand i vad a spende des sold a quaich Teatro. Cosa l'asto paura? Ch'it mangia la dota? ch'it peussi pi nen mariete?

ANG. (*sospirando*) No, no, tem nen: coul di a vnirà mai.

GIOA. (*ridendo con malizia*) Lassa 'n poch. Son già acorsume 'd quaicosa: i sai tut.

ANG. (*turbata, in fretta*) Cosa sasto?

GIOA. Che Monssù Gatin a tē schissa l'eui, o pèr di mei, a t'ii schissa tuti doi.

ANG. Oh! va 'n poch! Dco ti stamatin 't ses ficate an testa 'd feme anrabiè.

GIOA. Donque la dëscuyerta i l'ai nen fala mi sol?

ANG. Già, dco Ghitin un moment fa... Gofarie!

GIOA. Ghitin a l'a doi ojet furb, ch'a sciairo dco parei d'ii me.

ANG. Eben, sta volta i seve borgno tuti doi. (Ancora pro ch'a san 'd niente!)

GIOA. It farii pa 'n cativ afè, sasto? Gatin a l'è nen bel, ma a l'è grassios e a l'a 'd bele manere. A l'è niente sentimental, a l'è vera, ma pèr compenss a l'è grass, robust, ben piantà, e coule li pèr nē spos a son qualità rispetabii. *(discorrendo avrà tirato di tasca una scatoletta di fiammiferi, e ne accende uno fregandolo sui calzoni)*.

ANG. *(come per deviare il discorso)* Bravo! Fërta i brichet sle braje, brusie, strassie, e peui mi passo tutta la seira a sarsi e taconè.... Senssa giudissi, va!

GIOA. A l'è mei ch'i torna ant mia stanssa. Stamatin i t'as quaicosa pèr travers.

Scena Quarta

BRONSOGNA, e detti.

BRON. *(di dentro)* Cerea. Ass peullo vnisse?

GIOA. Avanti.

ANG. Chi ch'a jè?

BRON. *(poveramente vestito da ciabattino, tiene da uno*

mano un logoro berretto e dall'altra un paio di stivali) Son mi, Bronsogna 'l ciavatin. (*entra in scena*).

GIOA. Ah! it ses ti?

BRON. Cerea, Sor Avocat. cerea, tota. Son vnuje a portè i stivai 'd so papà.

ANG. 'T podii deije dè dlà a Ghitin.

BRON. A jè pa gnun, sala?

GIOA. Anlora sesto passà pèr la finestra?

BRON. La porta a l'è ancontra, i l'ai spetà 'n poch, i savia gnanca s'i doveissa vni anans.

ANG. Ai fa nen: posie là. La serva a sarà 'ndaïta an crota.

BRON. Sisgnora (*va a deporre gli stivali sulla lastra di marmo del caminetto*).

GIOA. Ma dis, cos fasto? Veñsto mat? Elo coul li 'l post dle scarpe?

BRON. (*ripiglia gli stivali*) Ch'a scusa, i l'avia nen fait a ment. Mi ant mia sofiëtta i buto tut sul fornèl.

ANG. Damie a mi. (*li prende e porta fuori della comune*) Cos'elo ch'a fa la rangiura?

BRON. A faria disset e mes; ma là! i guardoma nen 'l tut con lor ch'a son 'd pratiche.

GIOA. A l'è vera: i l'avoma sempre le scarpe strassà.

BRON. 'L mes i lo lassoma 'ndè. I l'ai deo butaje set o eut bröche, ma ii conto nen, j regalo.

GIOA. Grassie mile! Coul a l'è 'n regal ch'i t'n fas! Piite goarda, it vas an malora, sasto?

BRON. I l'ai nen paura 'd loli. Pi a toch 'd lon ch'ison, a l'è impossibil.

ANG. (*che sarà andata al fondo a prendere i danari nel cassetto*) E toa mama stala mei?

BRON. A l'è sempre a l'istessa mira. L'autr di 'l medich a voria ch'i la feissa portè a l'ospidal. ma fin ch'i peuss tnime drit, e avei quat solda compreje 'na scudèla 'd brod e 'na mica 'd pan, i veui nen ch'am chita.

ANG. Bravo! Ass vèd ch'it ses un bon fieul.

GIOA. Oh! dis: i chërdo ch'a staria mei a l'ospidal ant un bon let, e ben cudia, che ant 'na sofiëtta mal nuria, mal cogià e mal cuverta.

BRON. A l'è pa vera, salo, Sor Avocat? A l'è pa vera. Ch'a guarda: ai fa pi bon pro coul poch ch'i peuss deje mi, che tute le pape e le cure 'd l'ospidal. A ca jè 'l cheur, capisslo? l'afession 'd so fieul; ansilà, an mes a coule quat mura pa vaire.

ANG. I t'as rason. Dësgrassià coul ch'a peul nen fene senssa.

BRON. E peui a pensè che, dop mort, ai ciapulo parella sautissa, am ven freid mach a parlene.

GIOA. Epura, me car, se pèr guarila a doveisso feje quaich operassion, bsognria ch'i t'aveissi pa sienssa.

BRON. Oh! sì, che operassion? A l'è 'l medich ch'ai vnisia prima ch'a l'a ruinamla.

GIOA. Ti cosa na sasto?

BRON. Ch'ass immagina: mia povra veja a l'avia n'infiammession da caval a la fricassà, e chiel a l'ampia 'd china pēr guarila da la frev putriga. I lo chërdo dco mi ch'a l'avia la frev putriga, e a l'aveissa bin nen avula, coul aso a l'avia trovà 'l mojen 'd feila vnì.

GIOA. 'T saras ti ch'it ses ficate lon an testa.

BRON. Oh! nosgnor, a l'è 'l dottor dla parochia ch'a l'a dimlo: 'n brav fieul ch'ass ocupa e ch'a sa. Da dop ch'ai ven coul medich li, mia mare a l'a sempre aquistà quaicosëtta. Bel e 'l prim di ch'a l'è vnù, a l'a subit dime che la maladia a l'era staita sbalià, e che la china a l'avia brusaje tuti i buei, fiña 'l ministeri e 'l peritoleo.

GIOA. (*ridendo*) Cosa diao 't diësto? Të stropii tuti i nom. A l'avrà dite 'l mesenteri e 'l peritoneo?

BRON. Magara. Mi si ch'i sai! I conosso pa la lotomia. 'L fatto a l'è, che la china e j autri pastrocc a l'a famie campè tuti ant la cort.

ANG. E l'aut medich?

BRON. L'ai mandalo a fesse scrive. I speto mach pi ch'a veña a fesse paghè le visite. Là bela moneda a l'è pronta.

GIOA. L'asto già fait 'l pachet?

BRON. Sisgnor: l'ai ampactà dontrè forme fruste, pēr tireije ant la schiña.

GIOA. Bèrgne! ti, com it paghi i medich.

BRON. Oh! mi lo pago second i so merit.

ANG. (*porge delle monete a Bronsogna*) Tè! si a jè disset sold.

BRON. Grassie tante. A vèdrà ch'i stivai l'ai rangiaje an regola. So papà a na sarà content. L'ai butaje doe plesse tanto ben gionsue, ch'a bso-gna guardè mes ora pèr vèdie.

GIOA. L'autèr di t'as dime istess dle mie scarpe, e peui doe ore dop a l'ero torna dèscusie. Pèr fe prest t'as stopaje con 'd peis.

BRON. (*ridendo furbescamente*) Eh! là. A capiss, al veul dco 'n po 'd politica pèr fe andè la baraca. Se le scarpe a sè strasso, e mi torno a dèscusie. Parei la tabia ass manten an brando. e la mnestra a cheus tuti i di.

GIOA. E ass pia quaich ciouca la seira dla festa, o dèl luñes.

ANG. Cosa?... cosa?... Coul vissi ch'i t'as?

BRON. Oh! nosgnora, ch'a chërda pa lon. L'Avocat a l'a veuja 'd facessiè.

GIOA. Neglo nen, l'ai vèdute mi tante volte a intrè si souta ant la botega 'd Cadnass 'l portiè.

ANG. A l'è vera: 'l padron 'd ca a l'a daje licenssa 'd vende 'd liquor.

GIOA. E si, Bronsogna, a l'è uña 'd soe pratiche mei.

BRON. Nen tanta roba. Quaich volta, i lo nego nen, i vad a beive 'n cichet; ma, a capiss, son dco li piantà tut 'l di souta la porta a tirè la trà e a bate la sòla; a jè n'aria dèl diao, 'l freid

am ciapa, e j intro 'n moment dal portiè pèr scaudeme. Fiña li jè peui gnun mai, là!

GIOA. (*ridendo*) T'anne mai portate sù ant la sofiëta tra doi?

BRON. Oh! sì. Da dop che mia mare a l'è malavia i l'ai d'autr da pensè.

ANG. Veul di che dnans tant t'ii pensavi?

Scena Quinta

MERLATI, GHITIN, e detti.

MERL. (*di dentro*) A j elo vnuje gnun a sèrcheme?

GHIT. (*di dentro*) Nosgnor, Monssù.

ANG. Oh! sì a jè papà.

MERL. (*entra in scena dalla comune. La sua figura è buona ed aperta, le maniere severe ed affabili nel tempo stesso. Ha un abito nero pulitissimo, ma molto usato. Entrando si toglie il soprabito e il cappello, e li depone sopra una sedia al fondo*). Bondì, masnà, seve sì tuti doi?

ANG. (*gli stringe la mano*) Ciao, papalin!

GIOA. 'T ses vnù pi tard dël solit.

MERL. E ti sesto 'lvate 'd bonora, pigron? (*scorgendo Bronsogna*) Oh! Bronsogna ch'a jè si?

BRON. Son mi, son mi, Monssù Merlati. Stalo ben?

MERL. Benissim. L'asto portame i stivai?

ANG. L'ai ritiraje mi.

MERL. Cosa ch'it devo?

BRON. A l'a già pagame la tota. Arvèdie là! Ch'a scuso
'n po s'i son vnuje a dèstorbè. (*si avvia*).

MERL. Stame alegher.

GIOA. Bronsogna: ch'it mostra la manèra dè vni sgnor?

BRON. Magara!

ANG. Scouta nen chiel li, ch'a l'a mach dè storie.

GIOA. Guarda: fate fe 'na bela 'nsègna, con 'd parole
rosse, grosse com 'l brass, scrite an franseis,
ch'a dia: *Monsieur Bronsogna de Paris, maitre*
cordonnier. 'T vèdras che la gent a sè sbèr-
gnaco pèr fesse rangè le scarpe da ti.

BRON. Oh! si. Ai veul autr che l'ansègna e 'l *Monsieu!*
I l'avria dabsogn 'd trovè 'na comare parei
'd coula 'd Crispin, ch'i l'ai vist 'na volta al
Teatro, ch'am regaleissa 'n satchet 'd pesse da
otanta.

MERL. Povr'om! Coula là a l'è la Mort.

BRON. A l'è vera: ma coula ch'i l'ai vist mi al Teatro
Gerbin, a mostrava pa j oss, no: a l'era 'na
Mort bela, tèggia, grassa, pieña 'd giuss, frësca
com 'na reusa, ch'a cantava com n'arsigneul
e ass tirava i basin da lontan com n'arsigneul

GIOA. (*ridendo*) Oh! birbant d'un Bronsogna. A l'elo
pa innamorasse dla Mort!

BRON. (*ridendo egli pure*) S'i fussa sicur che la Mort
ai smieissa a coula là, i saria content ch'a
vneissa a pieme bel e stasseira.... Cerea, là!
ch'a mangio con bon aptit. (*via*).

Scena Sesta

Detti, meno BRONSOGNA.

GIOA. Matass, va! A l'è drolo com tut coul fabioch.

MERL. Ancora pro ch'a l'è 'd bon umor. Lolì ai giuta a soportè soa miseria.

ANG. *(che sarà entrata un momento a sinistra ritorna con una veste da camera)* Tè, papà! si a jè toa vesta da camera.

MERL. Oh! brava. *(Angelina lo aiuta ad indossarla)* Così i stagh ancora mei. 'L disnè l'elo an camin?

ANG. Ghitin a jè d'antorn, i chërdo ch'a j andarà pa pi vaire. Adess ii ciamo. Ghitin! *(chiama verso la comune)*.

MERL. T'as bin die ch'i disnavo a mësdi?

GIOA. Diascne!... A sa ben che tute le feste i mangioma a coul' ora lì.

Scena Settima

GHITIN, e detti.

GHIT. L'anne ciamame?

ANG. Com valo 'l disnè?

GHIT. A jè tut an brando. L'ai butà adess la supa al feu a mitonè.

MERL. La supa? Am rincress. L'avria avù pi car ch'i t'aveissi fait 'l risot.

GIOA. Mi deo. La supa am pias niente d'autut.

GHIT. I l'ai fait lon ch'a l'a ordiname la tota.

ANG. (*a Merlati*) It podii ben dimlo.

GHIT. S'a veulo, i souma ancora a temp. Gavo la supa e buto giù 'l ris: l'è 'n moment.

MERL. No, no, lassa stè: ai fa pa nen. A l'era mach pèrchè 'l ris ai pias tant a Gatin, e ancheui l'ai invitalo a vni a disnè con noi.

GIOA. Ai ven Gatin? Son content. I riiroma 'n poch.

ANG. Oh! n'autra adess. A st'ora tè speti a dimlo? T'podii deo avertime, l'avria fait piè quaicosa 'd pi.

MERL. Sì ch'i savia! L'ai ancontralo 'n moment fa sout ai porti.

GHIT. Là! ch'am dio prest: cos' i l'aine da fe? 'L ris, o la supa? S'i stag sì tut a brusa.

MERL. Lassa, lassa lon ch'a jè. Chiel li a l'è pa 'd gena.

ANG. I lo sai pro, ma i l'avoma poch o niente.

MERL. Sagrinte nen. L'ai pià mi quacosëtta. (*a Ghitin*)
Va, va an cusina.

GIOA. E fa prest. A l'è mes ora ch'i traondo la saliva ciaira.

GHIT. Oh! bin pèr chiel, a la traond tut 'l di. (*via*).

Scena Ottava

Detti, meno GHITIN.

ANG. Anlora i l'ai giusta temp: vad a polidime 'n poch, a cambieme coust corp.

MERL. A jè pa gnun 'd coui bsogn. T' sesto nen polida abastanssa?

ANG. Tra noi ai fa niente, ma quand ai ven 'd gent...

MERL. Gatin a l'è 'd ca. A jè gnuñe gene da piesse.

GIOA. (*ridendo con malizia*) Va, va a cambiete: t'as rason. Bsogna soagnesse s'un veul esse soagnà.

ANG. Finissla 'na volta con le toe gofarie!

MERL. Cos' elo ch'a jè?

GIOA. A jè, che Angeliña a veul nen ch'ai sia, mentre mi sai ch'a jè...

MERL. Cośa?

GIOA. (*con caricatura*) La ponta ant 'l cheur pèr Gatin.

ANG. (*arrabbiata*) Impertinent, va! S'ai fussa nen papà i vorria dite lon ch'a fa dabsogn.

GIOA. (*ridendo*) Dis, dis pura.

ANG. (Prest a finì mia létera) (*via*).

Scena Nona

MERLATI e GIOACHIN.

GIOA. A l'è an furia con mi pèrchè ii dio la vrità.

MERL. Lassla 'n po stè. S'ai veul ben a Gatin tanto mei. A l'è 'n brav fieul, un galantom, e a po-dria ciamesse fortunà s'a la sposeissa.

GIOA. Oh! ben pèr mi i saria bel e content. (*accende un sigaro*).

MERL. (*burbero*) Ti, ti it farii 'n po mei a nen ruinete 'l stòmi fumand tut 'l dì, e passand mesa la neuit a girolè pèr Turin. It dovrii butete a studiè 'n po 'd cheur.

GIOA. A coul rigoard li i chërdo ch'i t'abii niente da rimprovereme. Fin adess son mai stait andarè, me cours i l'ai sempre falo.

MERL. T'as falo, t'as falo.... A forssa 'd cissete parei d'ii beù, rompendsse i polmon a criete da la matin a la seira.

GIOA. (*mortificato*) I capisso nen pèrchè 't sii tant an colera con mi.

MERL. An colera bsogna 'ndeje pèr forssa. Voi altri basta ch'i mangi, ch'i beivi e i l'abii quai ch sold an sacocia pèr andeve a diverti, l'eve pa nen autr da pensè; ma 'n povèr pare 'd famia con un pcit stipendi e 'n pcit patrimoni, bsogna ch'a marcia gheub tut l'ann, ch'a passa le neuît a machinè pèr deve n' educassion, e porteve al ponto 'd guadagnève 'n toch 'd pan. Guarda 'n poch: an tut e pèrtut i rivo a peña a avei tre mila lire a l'ann 'd redit; epura, a forssa 'd tni da cont 'd coul poch, i l'ai tirave sù, butave a l'onor dël mond. E adess almeno i fusso a la fin dle speise e d'ii sagrin!.... Ma no, i souma sempre da capo. 'T sas lon ch'a l'a costame la maladia 'd toa povra maman.... A l'è stame pi d'un ann ant 'l let. Nen bastand nost pcit redit, i l'ai dovù consumè 'na part dël me capital. Almeno Nostsgnor a l'aveissà (*gli occhi*).

GIOA. Papà! pensie pi nen.

MERL. Adess peui ai va torna tre mila lire pèr ti.

GIOA. Pèr mi?

MERL. Purtrop! Da si a dontrè di a bsogna ch'it vadi a tirè, la lege neuva at esenta pi nen, pèrchè mi l'ai ancora nen sinquant'ani. Venta butè 'l rimpiaasant.

GIOA. Che rimpiaasant?... E mi sonne nen bon?

MERL. Lo sai pro ch'it ses bon; ma i studi, la carriera, tuti i dnè ch'i l'ai speis? L'alo da esse tut pers?

GIOA. No, no, papà! I pèrmetreù mai che pèr mi 't fassi 'n sacrifici 'd coula natura!

MERL. A va fait e i lo fareù con tut 'l cheur, ma almeno seconda mia boña volontà, studia e fate om.

GIOA. Sta tranquil ch'i t'avras nen da lamentete 'd mi.

MERL. Goarda: mi l'avria studià volontè, e forse i l'avria fait 'na bela carriera; ma me papà, om 'd negossi, con motoben 'd famia, a l'avia nen i mojen 'd mandene tuti a l'università. L'ai mach fait retorica, e peui son ficame ant 'l comerssi. La fortuna l'a mai secondame vaire; e, couma ch'it vèdi, da des ani a sta part i son comess ant 'na banca, con mileutsent lire a l'ann 'd paga, ch'a bastria a mala peña pèrdene da mangè, s'i l'aveissa nen 'l peit redit dla dota 'd toa mamam, e 'd quaicosëtta ch'a l'a lassame me pare.

GIOA. E falo peui bsogn d'esse tant sgnor pèr esse felice?

MERL. No, ma però l'om a dev trasandè niente për
 procurè 'd miliorè soa condission. 'L mei a l'è
 sempre 'd pi che 'l bon. (*campanello di dentro*).

GIOA. A l'an sonà, a sarà Gatin.

MERL. Magara ch'a sarà chiel. A l'a dime ch'a vnisia
 subit.

Scena Decima

GHITIN e detti, poi Monssù FAUSETTA.

GHIT. Monssù, a jè 'n sgnor ch'a lo serca.

MERL. Chi ch'a l'è?

GHIT. Mi lo conosso nen.

GIOA. Disie ch'a veña anans. (*Ghitin via*).

MERL. Chi sà chi ch'a sia a st'ora?

GIOA. Ai ven sempre quaich rompascatole a l'ora 'd
 mangè.

GHIT. (*ritorna parlando con Fausëtta, che la segue*)
 Monssù, a l'è si! Ch'ass daga dla peña.

FAUS. (*uomo di mezza età, vestito in lusso, con sottobonoma affettata e complimentosa, ed ha sempre il sorriso sulle labbra*) Oh! Moassù Merlati, i
 son mi si a dëstorbelo. Përmetlo ch'ii ciama
 'd soe bele neuve? (*Ghitin gli prende cappello
 e paletot, li depone sopra una sedia al fondo,
 e via*).

MERL. Bonissime, Monssù Fausëtta. Mai pi saria immaginame ch'a fussa chiel. Ch'a s'acomoda.

FAUS. (*prendendo una sedia che gli presenta Gioachin*) I lo ringrassio ben. Elo so fieul coust giovnot?

GIOA. Sisgnor.

FAUS. A l'a 'n bel fieul. li fass ben i me compliment. A studia? Natural?

MERL. A fa 'l ters ann 'd lege.

FAUS. Ma bravo, ma bravo! Prest prest ii butoma la toga. Im na ralegro tant. A l'a ben dco 'na tota, s'im falisso nen?

MERL. Sisgnor: a l'a n'ann 'd pi che si me Gioachin. A l'è chila ch'a fa 'ndè la ca.

FAUS. Fortunà, Monssù Merlati, d'avei 'na così bela famia.

MERL. Chiel, da lon ch'i vëdo, a sta benone?

FAUS. A jè pa 'd mal, i vad via bogiatand.

MERL. Cos'elo ch'am procura 'l piasì 'd soa bela visita?

FAUS. Me car Merlati, i son vnù pèr parleje d'un afè...

MERL. Son tut si da chiel...

GIOA. (Mi si i fass niente. A l'è mei ch'im la sbigna).
Con permess. (*salutando*).

FAUS. (*si alza a metà dalla sedia*) Padronissim. Ch'a atenda.

GIOA. (Che facia 'd ghignon!) (*via*).

Scena Undecima

MERLATI e FAUSETTA.

MERL. Cos'elo ch'a l'a da dime?

FAUS. Eco, im spiego an doe parole. Jer, dop disnà. Monssù Dësbèla a l'è vnù a troveme, e a l'a contame ch'a l'avìa comprà a l'incant 'na cassiña da le part 'd Pinereul. 'L pressi, da lon ch'a l'a dime, a l'era montà 'd pi 'd lon che chiel a pensava, pèrchè a j era motoben 'd gent a die; ma tratandsse che i beni a fasio pessa, a l'a nen guardà 'l tut, e a s'è nen lassasse scapè l'ocasion. La cassiña, i la conosso, a l'è uña dle mei. A l'a fait un bel contrat, un contrat d'or, un contraton. Për finì tut però, a jè ancora 'n pcit afè da rangè.

MERL. I capisso nen, come mi...

FAUS. Ch'a speta 'n moment. Com ass fa 'nt le compre 'd coul gener, ass trata 'd paghè subit. Eco 'l ponto principal dla question.

MERL. S'a l'a comprala a pagrà.

FAUS. (*ridendo e offrendo una presa di tabacco a Merlati*) Paghè va pro ben, ma bsogna aveije.

MERL. Oh! bin sigur.

FAUS. E a die la vrità, Monssù Dësbèla a l'a nen tuta la somma. Vèdlo dov'a sta 'l busillis?

MERL. Ch'a pensa a trovela.

FAUS. Eco, Monssù Merlati, ch'i comenssoma 'ntendsse.
I son da chiel pēr loli.

MERL. Couma? A veul ch'ii prēsta dē dnè? A l'è impossibil. Dov i l'aine da pieje?

FAUS. Ch'a lassa 'n poch, ch'a lassa 'n poch. S'a veul presteije a j à pro.

MERL. Cosa veullo ch'i l'abia? Chiel, Monssù Fausëtta, a sa tuti i me afè, pontin pēr pontin. A peul ben figuresse s'i son ant 'l caso 'd fe n'imprestitt parei. Chiel pitost, ch'a l'a i marenggh a torëtta, a peul fe loli senssa dēsrangesse pēr niente.

FAUS. Mi, ii dirai la cosa caira couma ch'a l'è: ii provēdo 'na somma pitost vistosa, ma a basta nen. Pēr fe 'l compliment a j andaria ancora tre o quat mila lire.

MERL. Ma gnanca mes; mi i son pa ant 'l caso. S'a l'a gnun dnè, ch'a fassa a meno d'andè a comprè 'd cassiñe.

FAUS. Ch'a senta, Monssù Merlati, ii parlo da amis: a sa che pērsoña ch'i son; a sa ch'i son nen capace 'd die 'na cosa pēr n'autra; s'ai j'ài ch'ai j prēsta, a fa 'n bon afè. Ch'a goarda: poche parole: l des pēr sent, e le cedole al par.

MERL. Cosa chērdlo? I fas pa l'usurari, no! Im sentiria 'l rimorss ant la cosienssa 'd piè la gent pēr 'l col ant coula manera.

FAUS. (*ridendo*) Oh! mi povr om, che scrupoi ch'a l'a chiel! la libertà 'd fissè l'interesse a l'è

garantia da la lege, a l'è 'n ram 'd comerssi parei d'un autr. Dël rest, ch'a dia: ancora mei; pi a bon pat a n'j dà, e pi a contenta Monssù Dësbèla.

MERL. Ma a l'è ch'i peuss nen contentelo, nè a bon pat, nè ant nsuñe manere.

FAUS. Ass fidlo 'd volte nen 'd mi? A chërdlo nen lon ch'ii dio?

MERL. Tut autr. Son parole ch'a dovria gnanca dime. S'i fussa nen fidame i l'avriine prëstaje trant'e-sinch mila lire, ch'a formo tut 'l me patrimoni, a Monssù Dësbèla, senssa gnanca cosslo? I l'ai fait lon dietro soa ricesta, Monssù Fausëtta. I dnè l'ai sborsaije a chiel, incariandlo 'd piè l'ipoteca. I podria pa avei ant soa përsa 'na confidenssa pi cieca, pi illimità.

FAUS. Dal moment che Monssù Dësbèla a l'a passame procura general pë'r tuti i so afè, a l'è mach con mi che chiel a dev avei 'd relassion, l'autr a j intra pë'r niente. A l'è n'ann e mes ch'a l'a prëstame coui dnè pë'r cont 'd Monssù Dësbèla, j interessi i l'ai pa mai faije spetè 'na minuta?

MERL. No, no; jè niente a die, a l'è sempre stait pontualissim.

FAUS. Corage, dunque! Ch'am dia nen che 'd no, ch'a fassa deo 'l rest.

MERL. Oh! Santo Dio... Là! Ch'a senta, Monssù Fau-

sëtta: veullo propi ch'ii deurva 'l me cheur?
Ch'ii dia la cosa couma ch'a l'è?

FAUS. I desidero nen autr.

MERL. Eben allora ii dirai, che tre mila lire i j'ai ancora, ma cosa servlo? a son pi nen mie.

FAUS. Couma? A son pi nen soe? (A bon cont i sai ch'ai j'à).

MERL. A l'è propi parei. Son tute economie ch'i l'ai fait, e ii teño lì pèr paghè 'l rimpiassant a me fieul.

FAUS. L'alo da paghelo subit?

MERL. Subit no, ma tra quatr o sinch meis, second com andarà 'l tirage.

FAUS. Oh! ma allora a jè temp a fe tut. Da sì a tre meis mi ii pago j'interessi, e ii restituisso 'l capital.

MERL. A va pro ben, ma dësprovedsse 'd pianta...

FAUS. Ai ciamlo dësprovedsse chiel, a fe frutè i so dnè?
Combinoma lon, là! Pèrdoma nen temp.

MERL. (*indeciso*) Ma, sì su doi pe? Elo nen bon pèr doman?

FAUS. No, la cosa a pressa. Dësbèla e mi partoma doman matin pèr Pinereul, e j'andoma a fe 'l pagament.

MERL. Che om benèdet! Am fa fe tut lon ch'a veul chiel.

FAUS. Ch'am chërda mi, a sarà nen mal content.

MERL. Là! Ch'a veña dëdlà ant la mia stanssa. I guar-drai 'd contentelo.

FAUS. Andoma pura.

MERL. (*fermandosi*) Adess ch'ii penso, l'ai nen 'd carta bolà.

FAUS. (*tira fuori di tasca un rotolo di carta*) I n'ai mi, i n'ai mi, i son sempre provist. Ass va nen a fe la guera senss'arme. (*seguendo Merlati*) (L merlo a l'è an gabia. L'afè l'è fait). (*via ambidue a sinistra*).

Scena Duodecima

GHITIN con tovaglia e l'òccorrente per preparare la tavola.

GHIT. (*disponendo il tutto sulla tavola di mezzo*) Che vita d'infern a l'è mai fe la serva! Massime ant coule casupole ch'a l'an nè da vive nè da muri. Av dan i dnè contà, av peiso la roba, a veño a gaveve 'l bosch d'an sël feu, av fan girè la testa da n'alba a l'autra. Bsogna pen-
tneje, ramasseje, polidie, brusesse la faccia e le man, rompse 'l fil dla schiña pèr durmi ant un coridor, con set lire al meis e la mnestra freida. Uh! Ma a l'è mi ch'i son 'na gofa. I lo merito propi, son mai savume gavè d'ant le strasse. S'i voreissa, con mia faccia e 'l me spirit i podria fe la sgnora. Ah! gioradindo. I son già stofia a 'n bel ponto, e s'ass presenta l'occasione, i sarai pi nen tanto gnoca da lassem-la scapè. (*campanello di dentro*) E daila stamatin! La corda dël ciochin a dovria già esse bujenta. (*via dalla comune*).

Scena Tredicesima

ANGELINA con un abito più elegante, poi GATIN.

ANG. I sentia a parlè si ant la sala. A smia ch'a sio andassne. Ghitin a l'a già prontà la taola. Oh! ben pèr mi ancheui i son nen ant 'l caso 'd traonde 'n bocon; l'ai lè stomi tanto sarà, ch'ai passria gnanca 'na graña 'd mèi. Traditor! senssa cheur, va! Veuì feje vède s'i son forta e risolua. La létera a l'è sì, (*indica il seno*) Madama Trombet a vnirà dop disnè, ii la darai ch'ai l'armèta.

GAT. (*ridendo forte di dentro*) Toira, toira, Ghitin, e piite goarda ch'a brusa. (*entra in scena con un involtino in mano e lo depone sulla tavola*) Oh! tota Angeliña. Chila la prima ch'i vèdo? Ancheui i son propi fortunà, (*le stringe la mano*) son butame la camisa a l'inverss.

ANG. Bravo, Monssù Gatin! A l'è stait 'd parola.

GAT. Tratandsse dè vnila a vède chila, j andaria a gattagnau pèr doi miia, aut che manchè 'd parola. Papà e Gioachin dova sonne?

ANG. Pèr li dèdlà, i sai gnanca diilo. Papà a dev parlè con quaichedun.

GAT. Tanto mèi. (*levando un mazzolino dalla bottoniera dell' abito*) Così im asardo a preghela d'acetè coust bochetin, ch'a veul di tante cose. (*presenta il mazzetto a Angelina che lo accetta*).

- ANG. (*guardandolo con furberia e ridendo*) E cosa veullo di?
- GAT. (*arrossendo confuso*) Che mi... che chila... L'ai compralo sot ai porti, a l'era al fresch ant 'na gavia.
- ANG. Tut loli ch'a veul di?
- GAT. (I son propi 'n tupin, son mai bon a parlè!) Oh! (*si dà un colpo sulla fronte*).
- ANG. Cos'a j'elo? A l'a fame sburdi.
- GAT. I fasia 'na dësmentia. L'ai trovà mach adess sot a la porta Madama Trombet, coula veja ch'ai ven sempre ansisi...
- ANG. Eben?
- GAT. A l'a pregame, pèr nen fe le scale, ch'i j armè-teissa coust pachetin ant soe man. (*leva di tasca un piccolo pacco e lo dà ad Angelina*) A l'a raccomandame ch'i lo deissa a gnun autri.
- ANG. (*turbata, impallidendo*) (Ah! brutta gofa: imprudenta 'd 'na veja!) I lo ringrassio tant. Monssù Gatin.
- GAT. Niente d'autut, i son famne 'n piasì. Mi pèr fe le cumission i son fait a posta.
- ANG. (Son sicura che Alfredo a l'a scrivume).
- GAT. Stala nen ben, tota?... A l'a n' aria 'n poch stravirà.
- ANG. (*come sopra*) I l'ai 'n dent ch'am fa mal.
- GAT. Bon segn. A veul di ch'a l'è innamorà.
- ANG. A' podria anche desse.
- GAT. Darmage che 'l mal ass peussa nen trasmètsse.

sednò i la pregria 'd feme 'l regal 'd so dolor
e 'd so dent, e mi an cambi ii na daria un
d'ii me, ch'a mastio ch'a l'è 'na delissia.

ANG. I lo ringrassio ben tant. I so dent ch'a s'ii teña
për chiel, ch'ai vniran ben a tai. Ch'a scusa,
'd chiel im dispenso, i lo lasso sol për un
moment.

GAT. I vorria vède ch'ass geneissa!

ANG. (Son impassienta 'd lese cos am scriv coul im-
postor. *(via a destra)*).

Scena Quattordicesima

GATIN solo, poi GIOACHIN.

GAT. I peuss sbalieme, ma am smia che tota Ange-
liña a l'abia capime. I chërdo d'andeje a genio.
Malheur ch'i l'ai mai corage dè spiegHEME pro-
ciair. Prima dè vni s'ì im fass 'l pian, im pronto
'l discors, i studio le parole ch'i l'ai da die,
peui peña ch'i la vèdo, vate fe scrive!... Am
manca 'l fià, le gambe am tramolo, am ven
la lenga spëssa, e i resto lì 'n bel merlo couma
ch'i son.

GIOA. (*correndo a stringere la mano a Gatin*) Oh! salve,
Gatine dilectissime. L'ai senti soa vos da dèdlà.
A l'è rivà finalment!

GAT. Son vnuje a mangè 'na costa.

GIOA. Fusslo vera ch' i podeisso mangessie ansem
tuti i di!

GAT. Ch'am dia nen lon, pèr carità! Se loli a succe-
deissa, am smiiria 'd tochè 'l cel con le man.
A l'è n'idea, un seugn, ch'am lassa gnanca
deurme.

Scena Quindicesima

GHITIN con due bottiglie, e detti.

GHIT. Com a falo, Monssù Gatin, a sognè senssa deur-
me? (*mette le bottiglie sulla tavola*).

GAT. I saria ben ambrojà a rispondte.

GIOA. I lo chërdo deo mi.

GAT. Epura a l'è paria.

GIOA. (*a Ghitin*) Elo ancora nen 'ndait via coul sgnor?

GHIT. A l'è ant la stanssa con so papà. Un bel nojos!
Pèr causa soa la fritura a l'è vnua sècca, go-
règna parei dla sòla.

GAT. Tanto mei. Mi la roba pi a l'è dura, e pi am-
pias. (*con serietà comica a Ghitin*). 'T sesto
nen 'd me parer?

GHIT. Mi no, mi. Am piyas la roba tènra. A l'an pa-
tuti 'n stòmi parei 'd chiel, no, che d'istà prima
'd cogesse ass mangia 'na salada 'd cocomer
pèr durmi pi tranquil.

GIOA. (*ridendo a Ghitin*) Chi ch'a l'a dite lon? (*a Gat-
tin*) Elo vera?

GHIT. A l'è Monssù Gatin, bel e chiel ch'a l'a dimlo.

GAT. Sta 'n po chieta. Chila li, s'ancaleissa, am faria

passè pèr nē struss, mentre mi mangio tant com un passarot.

GHI. Anlora, pèrchè contlo 'd busie?

GIOA. (*impazientandosi*) Ma valo ancora nen via coul secant?

GHI. Ch'a goarda s'a fa nen vni 'l ghignon! L'ai ancora 'n piat douss da fe, ma i peuss pa butelo al feù pèr paura ch'a brusa. A jè tut da cudì, e stamatin gnanca la tota ass lassa nen vède pèr giuteme 'na man.

GAT. I vad mi a giutete, folassa! I son un cusinè 'd prima forssa...

GIOA. Mi dco, s'it veuli, i vad a toirete quaicosa.

GHI. Oh! ch'a vada 'n poch a toirè an Bèrtoula.

GAT. (*prende l'involto che ha posto sulla tavola*) Tè! Im dësmentiava 'l pachet.

GHI. Cos'alo pèr li drinta?

GAT. Dontrè fètte 'd salam, ch'i l'ai comprà da Lanssa sot ai porti 'd San Carlo.

GIOA. L'aviilo paura ch'i n'aveisso nen?

GAT. Eh! che 'd salam ai n'a jè mai trop. Elo nen vera, Ghitin? Tè: butlo ant un piat.

GHI. Monssù a l'a già portane 'd coul cheuit.

GAT. li mangëroma tuti doi. (*ridendo a Ghitin*) A ti, Ghitin, at piaslo 'l salam?

GHI. Am pias... am pias... 'na nona.

GIOA. (*abbracciando Ghitin*) Là! andoma a toirè 'l piat douss.

GHI. Giù coule man! Ch'a staga ferm.

GIOA. Andoma a sofie ant 'l feu. (*dà un bacio a Ghitin mentre Angelina esce dalla sua camera*).

GHT. Brut impertinent! (*fugge dalla comune. Gioachin le corre dietro*).

GAT. Autr che sofie ant 'l feu! Da lon ch'i vèdo a saria mei dèstisselo. (*via*).

Scena Sedicesima

ANGELINA sola.

ANG. Sfacià d'un Gioachin! 'D coule scene li ant no-stra ca!.... No, no: a bsogna alontanè 'n pericol parei pèr me fratel. A l'è necessari, a l'è me dover provèdie an temp. I la mandrai via bel e d'ancheui.... (*riflettendo*) E mi?... N'aine gnun rimprovero a feme? Purtrop: la corrispondensa ch'i teño con Alfredo da n'ann a sta part a l'è 'na colpa, perchè i l'ai mai sentume 'l courage 'd diine niente a me papà. Dop la prima volta che la fatalità a l'a famlo incontrè ant coula festa, i l'ai mai pi parlaje, a l'è vera. i l'ai niente 'd mal a rimprovereme; pura a basta coul segret pèr tnime ant n'agitassion continua. Cousta letèra ch'a l'a mandame poch fa (*leva dal seno una lettera*) a l'è strana pèr mi. A s'è mai avansasse a feme 'na proposi-sion simil. Scrivme l'indiriss 'd so alogg, e dime che doman matin i vada da chiel, se soa

vita a m'è cara. Ah! pèr esempi, a l'è 'n pre-
tende 'n po trop! Disgrassiatament la condis-
sion 'd mia famia am lassa libera 'd mie as-
sion, ma i prinssipi ch'am guido a son trop
sacri pèr ch'i peussa dèscostemne 'n moment.
S'am veul ben, com'a dis, ch'ass presenta a
me papà, e ch'a sè spiega 'na volta. A jè 'd
gent. (*nasconde in fretta la lettera*).

Scena Diciassettesima

MERLATI, FAUSETTA, e detta.

FAUS. Va ben, va ben: doman ch'a passa da mi, ch'a
porta l'obligh, i lo faroma signè da doi testi-
moni, pèr ch'a sia pi tranquil.

MERL. Ma s'a l'a dime che doman matin a va a Pi-
nereul!

FAUS. Ah! già. Li pensava pi nen. Ch'a veña vers seira,
i saroma 'd ritorn.

MERL. L'alo piaje le cedole?

FAUS. Diascne! Veullo nen? I saria 'n bel om, s'i
l'aveissa dèsmientià 'l pi necessari (*vedendo An-
gelina*) Oh! s'im sbalio nen, cousta a l'è soa
bela tota? Son ben fortunà 'd fe soa conos-
senssa.

ANG. Ben gentil, Monssù. La fortuna l'è mia.

MERL. (*presentandolo*) Monssù Fausëtta...

ANG. Ah!? Papà a lo nomina soenss.

FAUS. Ch'a guarda li: i l'ouma quaich facenda, quaich afaret ansem.

MERL. S'a voreissa fèrmesse a mangè 'n toch 'd bui con noi, am faria 'n vero piass.

FAUS. Li son ben obligà. I disno sempre a sinch ore.

MERL. Dco noi autri, salo? Ma 'd volte a la festa, pèr esse pi an libertà, i mangioma a mesdi.

FAUS. Ben fait, ben fait. J'eu l'onor 'd riverie.

ANG. Arvèdlo, Monssù.

MERL. Lo acompagnrai fin a l'uss.

FAUS. Ch'ass dësrangia nen, i lo prego. *(via con Merlati dal fondo)*.

ANG. *(disponendo le sedie intorno alla tavola)* Am piass nen vaire coula figura. A l'a 'n certo fe, 'n certo rie, ch'a ripugna.

Scena Diciottesima

GHITIN con due piatti, GIOACHIN, GATIN, poi MERLATI, e detta.

GIOA. A l'è andassne finalment. Corage! A taola. I l'ai lè stomi ch'ass dobia.

GHIT. *(depone i due piatti e via)*.

GAT. *(con una casseruola, rimestando con un cucchiaino di legno)* Lassme almen fini sta pitanssa.

ANG. *(ridendo)* Che bel deuit ch'a l'a Monssù Gatin a toirè!

GAT. Neh! ch'i toiro con grassia? (Son content 'd piasie).

MERL. *a Gatin entrando*) Ohè, galantom? L'ai ancora gnanca avù 'l temp 'd salutete.

GAT. Gnanca mi. I savia nen cosa dimne.

GIOA. Coul gonfion a s'è fèrmasse coul poch e coul pro!

MERL. (*preoccupato*) L'avio n'afè da rangè. Là! adess tut a l'è fini, mangioma 'n bocon an santa pas. Ancheui im sento aptit.

ANG. Monssù Gatin, ch'a posa coula cassarola, e ch'a veña a stesse si davsìn a mi.

GAT. Davsìn a chila?... Oh! gioja... Ghitin! Ghitin!

Scena Diciannovesima

GHITIN che ritorna con altri due piatti, e detti.

GHIT. Eco la fritura e 'l salam 'd Monssù Gatin. (*mette i due piatti in tavola. Tutti seggono. Merlati nel mezzo, Gioachin alla sua destra, Angelina a sinistra, Gatin tra Merlati e Angelina. Ghitin prende la casseruola e via*).

MERL. 'T sesto portate 'l salam?

GAT. Sì, pèr avei 'l piasì 'd ofriine 'na fètta a la tota: lon ch'a veul di tante cose

ANG. (*con caricatura imitandolo*) E cos'elo ch'a veul di?

GAT. Che mi... con 'l temp... (*si confonde*).

GIOA. (*ridendo e come seguitando il discorso di Ghitin*)
E la paja, i nespo a maduro.

GAT. (*arrossendo*) A l'è 'd coul d'Alessandria.

ANG. Che bele cose ch'a veul di! (*tutti ridono*).

GAT. (*mortificato*) (I son fiña stupì mi, d'esse tant aso). (*campanello di dentro*).

ANG. A l'an tornà sonè.

GIOA. Eviva! Stamatin i la finioma pi nen.

Scena Ventesima

GHITIN con una lettera, e detti.

GHIT. Un pcitin a l'a portà cousta létera pèr Monssù.
A dis ch'a l'è so fratel ch'ai la manda. (*la dà a Merlati*).

MERL. Me fratel?... Podiilo nen vnime a trovè senssa scrivme?

GIOA. Am smia dco a mi che...

ANG. A sarà malavi.

MERL. (*che si è alzato ed è venuto sul davanti della scena*) Scusa 'n moment, Gatin.

GAT. Fa, fa pura. Mi l'ai si d'ocupassion fin ch'i veui a gavè le grañe 'd peiver.

GHIT. A dovria piaisie 'l peiver a chiel.

MERL. (*che avrà aperta la lettera, legge*) « Mio caro
« Luigi: Ti scrivo in tutta fretta queste due
« righe, essendomi impossibile in questo mo-
« mento il recarmi da te. Seppi, pochi momenti
« or sono, da una persona stimabilissima, che
« il signor Falsetta sta per deporre il bilancio

« e fuggire. » (*impallidisce e si fa tremante*)
 « Parlasi di firme false, di somme carpite. »
 (*legge a stento*) « So che tu hai dei gravi inte-
 « ressi con lui, sappiti dunque regolare, e fa
 « presto i passi necessarii per non esporti a
 « perdere il tutto. » (*con un grido*) Ah! as-
 sassin... Infame!...

GIOA. e ANG. (*si alzano spaventati e corrono verso il padre*) Papà! papà!

GAT. (*accorrendo egli pure verso Merlati*) Cos' a j'elo?

ANG. Cosa ch'a l'è arivaje?

GIOA. Dis prest, pèr carità!

MERL. (*fuori di sé in preda alla più viva agitazione*) A l'an assassiname!.. ruiname!...

GIOA.)
 GAT.) Ma chi?

GHIT. (*Ruinà?... Im na vad bel e sta seira*).

MERL. (*passeggiando come forsennato, colle mani fra i capelli*) Prest, prest, me capel, me paltò... Ch'i coura... Basta ch'i sia 'ncora 'n temp!

GIOA. (*porta il soprabito a Merlati, che se lo getta sulle spalle dopo essersi levata in furia la veste da camera*) Ma papà!...

ANG. Disme almeno...

MERL. (*infuriato, mentre Angelina gli presenta il cappello*) Prest, perdio! Ass trata 'd tut nost avni, 'd tuta nostra esistenssa.

GIOA. Mi 't lasso nen andè sol.

GAT. I veño deo mi. (*Gioachin e Gatin s' indossano premurosamente il paletot e si mettono il cappello*).

ANG. E mi? Mi cosa faraine?...

MERL. Ti prega Nostsgnor, ch'a sia nen vera la nostra disgrassia. (*si precipita fuori della porta seguito da Gioachin e Gatin. Angelina siede abbattuta*). (*Cala la tela*).

Fine dell' Atto primo.

PROPRIETÀ di
RINETTI FORTUNATO

Via Berthollet N. 16

TORINO

ATTO SECONDO

Sala elegantissima nell'appartamento di Monssù Dësbèla. Mobili di lusso, seggioloni, divani, pendolo, ecc. Porta comune al fondo. A sinistra porta della camera d'Alfredo. Porte ai lati. Caminetto a sinistra.

Scena Prima

GIOAN dorme seduto sopra un seggiolone, colle braccia e la testa appoggiata sopra una sedia. Il pendolo batte le otto.

(Una grossa voce dalla strada) Ohoò! Spaciafornò!...

(Una voce più sottile ed acuta) Ohoò! Spaciafornò... oh!

Gio. *(svegliandosi di soprassalto)* Maladeti i ganasson!

A la matin a jè pi gnun bon a tni j eui sarà 'na minuta. *(sbadiglia e si stira)* A l'an bel esse elastiche, tant ass deurm mal ans le cadreghe. *(si alza)* Epura couma fe? 'L padron ass ritira a tre, quatr ore 'd matin, prima ch'a sia cogià a l'è tost di; ogni tant am ciama, sichè, s'i veui deurme, a bsogna ch'i pia quaich brod a sciancon 'n poch s'na cadrèga e 'n po s'n' autra. A paga ben, a l'è vera, ma bsognria esse 'd fer pèr podei seguitè 'na vita paria. I comensso a pèrsuadme tuti i di 'd pi che coust pan a l'è trop dur, e ch'a l'è necessari, quand'am riessa, ch'i pianta 'l padron e ch'im serca n'autr post.

I a d er, ecc.

(*rimettendo a posto le sedie*) E peui, s'im sbalio nen, a dev'esse tost an bolèta. A son doi ani ch'a jè mortie soa mare, e a l'a già tost fait sauté tut, fusslo staine! I chërdo anssi, ch'a sia 'mpisse 'd debit sul pat. I l'ai provà a die quaicosa, ma ai veul autr che mi a felo intende.

(*Una voce dalla strada*) Chi l'a 'd capei frust da vende?

Gio. Va a comprè i capei a l' infern! J un apress a j autri a scianco jorie. (*esaminando il caminetto*) Oh! povër mi. 'L feù a s'è dèstissasse.

Scena Seconda

FAUSETTA, e detto.

FAUS. (*affannato, col bavero del paletot tirato sù*) Gioan, a l'elo ant ca to padron?

Gio. Oh! Chiel a st ora, Monssù Fausëtta? Sisgnor a jè, ma a deurm.

FAUS. A veul di niente. Valo a dësviè, disie ch'i son mi, ch'i l'ai necessità 'd parleje, e subit; ch'i peuss nen fene a meno.

Gio. I ancalo pa. A l'a proibime assolutamente 'd dèstorbelo prima ch'a soneissa 'l ciochin. A l'è mach ritirasse stamatin a sinch ore.

FAUS. Epura la cosa a pressa, mi bsogna ch'ii parla.

Gio. I sai pa cosa die...

FAUS. A jè gnun autri mezzo. Për nen ch'at cria i lo dësviirai bel e mi.

GIO. Basta ch'i l'abia peui nen da portene la peña!
A l'è tanto mat...

FAUS. Sagrinte nen, i penso mi a tut.

GIO. Eh! là: anlora ch'a vada.

FAUS. (S'i rivo a salveme, a l'è 'n bel miraco). (*via a sinistra*).

GIO. Cosa ch'a veul di sta facenda? I l'ai mai vèdù Monssù Fausëtta così sbaruà, così afanà, con 'na fisionomia tanto arverssa. A dev' esse capitaje quaicosa 'd ben gross. Basta ch'a sia nen lon che mi prevèdo da 'n pess. La sia a forssa d'andè ant 'l pouss a finiss pèr resteje.

Scena Terza

GHITIN con scialle, cuffia, e detto.

GHIT. (*dal fondo*) Ass peullo?

GIO. Avanti.

GHIT. Elo chiel 'l meist 'd casa, 'l camrè dël padron?
Coul domesti ch'a l'è vnuje a durvime, a l'a mandame ansisi.

GIO. I son mi. Cos'elo ch'a veul?

GHIT. A l'è ben lor ch'a l'an dait comission 'd 'na serva?

GIO. Sì. A jè 'n post da creada, o pèr di mei, da governanta 'd lingerie, pèrchè 'd founne ai na jè gnuñe.

GHIT. Tanto mei s' ai na jè gnuñe. A l'è lon che mi serco.

Gio. S'a veul andè pèr serva ai conven nen vnì d' noi. Pèr fe la creada ai veul d'autre abilità.

GHIT. E chiel salo l'abilità che mi l'ai? Am pias coula li! Serva, creada, governanta, dona 'd compagnia, son disposta a fe tut.

Gio. Prima bsogna ch'i vèdo.

GHIT. 'L libret? A l'è giust. (*presenta un libretto*) Ch'a pia: ch'a goarda fin ch'a veul.

Gio. (*osservandola sotl'occhio mentre apre il libretto*) (Coul'è 'na ghigna ch'a l'a chila sì!) Gentuss che filera! A l'a servi mes Turin.

GHIT. Oh! bela. Quand am convnio nen ii cambiava.

Gio. Elo mai trovassne gnun ch'ai convneissa nen chila?

GHIT. E chiel l'alo mai trovane gnun ch'a l'abio faje piè 'l doi da coupe?

Gio. (Che lenga! A la larga!) Chi elo ch'a l'a mandala sì?

GHIT. L'ufissi dle serve. Ch'a goarda sì 'l biet ch' l'an dame.

Gio. Su coust biet a jè pa gnun nom. A jè mach 'l pian, e 'l numer dla porta.

GHIT. E loli a bastlo nen?

Gio. Veul dì che 'l nom dël padron a l'an nen diilo.

GHIT. A l'an dime niente. Cos' am na falo a mi? Ch' sia 'n po chi sè sia.

Gio. Ch'a goarda, mia cara: ass trata 'd serv

n'om sol, ma che quand ass buta a dà da fe pēr des.

GHIT. Immaginomsse! A sarà pa 'l diao, no.

GIO. (*ridendo*) I chërdo ch'ai sia 'n po parent.

GHIT. E com ass ciamlo sto gran pèrsonage?

GIO. A l'è 'n nom stravagant: Monssù Dësbèla.

GHIT. (*dà in uno scroscio di risa*) Ah! ah! ah! ah! Dësbèla? Alfredo!... Che combinassiont!... A l'è propi drola.

GIO. Da lon ch'i vëdo, a lo conoss già?

GHIT. (*ridendo e con malizia*) Un pochetin.

GIO. (Voria ben di, ch'ai fussa an Turin 'na creada o 'na serva ch'a lo conosseissa nen!)

GHIT. Ma guardoma! Senssa saveilo. Mai pi i saria figurame dë vni a tirè so ciochin. Im chërδια ch'a steissa sempre ant soa ca a Porta neuva.

GIO. A sa fiña dov a stasia?

GHIT. Contrari! L'aine nen da saveilo? Son staita doi ani ant soa ca pēr cusinera quand a j'era ancora la maman.

GIO. Si ant 'l libret però 'l benservi i l'ai nen vëdulo.

GHIT. (*francamente*) Son dësmentiamme 'd femlo fe.

GIO. (*con una smorfia*) I capisso!

GHIT. E chiel ai ciamà 'n diao a Sor Alfredo? Ma s'a l'è bon com 'l pan? A l'è propi 'n bon diao, 'd bon cheur com tut.

GIO. Oh! pēr 'd bon cheur a n'a fiña trop! (A l'è pēr lon ch'a l'è tost an malora).

GHI. I sai nen capì com' a peussa dè tant travai e tanti fastidi.

Gio. Eh! cara chila, bsogna provè pèr savei. Si ass bala sovenss, ass fa 'd siñe, 'd soarè, 'd disnè ch'a fulmino. Ass gieuga, ass canta, ass soña. ass fa 'd tut 'n poch.

GHI. E ben loli a fa ste alegher.

Gio. Coui ch'a l'an da serve, passè le neuit, tni tut ardrissà, ass diverto pa vaire.

GHI. Quantomeno ass guadagna dè dnè, ass mangia ben, e ass meuir nen d'inedia, com ant coule casupole ch'a veulo tni la serva, mentre a l'an gnanca da mangè lor a la festa.

Gio. Dle volte ant le ca peite a sè sta ancora mei. Ass guadagna quaicosa 'd meno, ma ass perd nen la salute, e ass viv pi tranquii.

GHI. Ah! ch'am fassa 'n po 'l piasì. I seurto giusta adess d'ant un rosto 'd 'na ca 'd coula gent dla bassa, ch'a veulo fe i sgnor senssa redit. Jer a smiava l'infern pèr là drinta: rabei, crij. pior, cose dl'autr mond. La padroña dop disnè a l'a 'ncora tirà a strapassème, mi l'ai mandala a fesse scrive, chila a l'a mandame mi: così stamatin i l'ai piantaje a rub e quindes. e adess, s'i peuss, veui arangeme ansisi.

Gio. Pèr mi peuss die niente, bsogna ch'a parla prima con 'l padron.

GHI. Oh! quand ch'a vèda ch'i son mi, a m'aceta sicur. Dov'elo ch'a l'è?

GIO. A l'è ancora cogià.

GHI. Uh! che secada.... E a che ora ch'ass leva?

GIO. Chi lo sa? D'ordinari a doi bot dop mesdi.

GHI. Anlora bsogna ch'i torna.

GIO. Stamatin a jè vnuje 'n sgnor a dësvielo, pèr
parleje d'afè. A peul esse ch'ass leva pi prest.

GHI. *(ascoltando verso la sinistra)* Ch'a senta: a smia
soa vos.

GIO. A l'è vera: a s'è lvasse. Son stupì ch'a l'abia
nen ciamame.

GHI. Ciuto! Miraco a passo dèdsà.

GIO. Ch'a veña 'nsema a mi 'n moment. Quand coul
sgnor a sia andassne, i guardrai 'd presentela.
(via dal fondo con Ghitin).

Scena Quarta

ALFREDO in ricca veste da camera, e FAUSETTA.

FAUS. Insomma, me car Monssù Dësbèla, i souma pers
tuti doi s'iss douma nen ardriss al pi prest.
Tuti i pacioch a son dëscuvert, e mia gran
riputassion a l'è bel e pèrdua.

ALFR. Cosa veullo ch'ii fassa? Ai toca a chiel a pen-
seje. L'aine nen passaje 'na procura general,
lassaje a chiel la briga 'd fe tut? Donque adess
cos venlo a conteme?

FAUS. Li conto ch'i l'ai 'l mandato d'arest a le spale,
che se chiel a riconoss nen le firme, ass trata

për mi 'd process, e forse forse 'd penitensiari, e 'd galera.

ALFR. Ch'a s'arangia! A dovia fe gnun pastiss. Mi m'na lavo le man.

FAUS. Così ch'am trata? Dop tut lòn ch'i l'ai fait për soa ca? I saria mai pi spetame 'na ricompenssa paria!

ALFR. Natural!.... I dovia 'ncora ringrassielo pèrchè ch'a l'a ficame ant j ambreui fin al col.

FAUS. E i so vissi, soe dësbauce, i dnè ch'a l'a campà via ant 'l gieugh, ai contlo për niente?

ALFR. Coui ch'i regreto 'd pi, a son coui ch'a m'a mangiame chiel. Ass chërdlo nen ch'i sapia ch'a l'è fasse 'n patrimoni ans mie spale, fassendme paghè 'l cinquanta për sent 'd lon che chiel, con mia firma, a trovava a fesse prestè al ses, o al set?

FAUS. Voriilo 'd volte ch'i lo servieissa a gratis? Ch'im rompeissa la testa për 'l piasì 'd paghè i so capriissi?

ALFR. A le curte: mi son an regola. Chi ch'a figura l'è chiel. I debit fait su ipoteca e sotoscrit da mi bsogna ch'ii riconossa për forssa, j autri toiro ch'a s'ii dësgavigna. Mi 'm n'ampipo pa mal!

FAUS. (*cercando di frenarsi*) Mònssù Dësbèla, ancora 'na volta. Butomsse d'acordi, a sarà mei për tuti doi.

ALFR. (*passeggiando*) I veui saveine 'd niente.

FAUS. Quand a l'è parei, i vad bel e adess a consè-

gneme. 'L bilanss i l'ai dalo, a provèdrà la giustissia.

ALFR. Ch'a provèda fin ch'a veul.

FAUS. Ma i lo averto già prima, ch'i presentrai tute le carte necessarie pèr gaveme 'l badò d'ans le spale, e fichelo dco chiel ant la bagna.

ALFR. Che carte ch'a veul presentè?

FAUS. Coule certe létere ch'am mandava quand a l'era an bolèta, e a savia nen dovà viresse pèr trovè dle monede. L'alo già dësmentiaje?

ALFR. (*ridendo*) Eben, cosa veullo provè con lon?

FAUS. I provrai la soa connivenssa, 'l so consens an tuti j imprestit ch'i l'ai fait, che chiel a s'è mangiasse soa part d'ii dnè ch'i l'ouma sgranfignà al ters e al quart. Finalment e peui mia cosienssa...

ALFR. (*interrompendolo con ironia*) Soa cosienssa? Oh! bravo. Sta volta a l'a tocà 'l tast 'l pi bon. Là, ch'ass buta li e ch'a fassa 'n discors; j assicuro ch'am faria piasì 'd sente 'l diao a predichè la moral. (*si lascia cadere ridendo sopra un seggiolone*) Ch'a dia, Monssù Fausëtta: s'ass sent la cosienssa a brusè, eben ch'a paga, d'ii dnè chiel a n'a. A l'a robane tanti! Figuromsse 'n poch, se prima 'd fe bancarota a l'avrà nen fasse 'l fondo pèr peui vive da sgnor ans le spale d'ii farfo!

FAUS. A dovria vèrgognesse, ant la posission ch' im treuvo, d'insulteme ant coula manera.

ALFR. (*cangiando tono*) Là! là! ch' a senta. I souma sempre stait bon amis, veui pa adess ch' iss tachigno parei. Cosa l'aine da fe?

FAUS. (Mia minacia a l'a fait efet). Riconosse le firme quand a sarà ciamà 'n giudissi.

ALFR. Bravo, chiel! Chissà quante a l'a fane senssa gnanca parlemne. Am restria gnanca pi 'na cadrega da stemie ansima.

FAUS. Una part almeno...

ALFR. Ma anlora 'l process a va anans l'istess. Tant a val uña com des, chiel a sarà sempre a l'istessa mira.

FAUS. Donque che parti piè?

ALFR. A l'è prima ch'a dovia penseje, nen spetè adess.

FAUS. (*passeggia concitato*) Maledeti pastiss!

ALFR. Ch'a senta. 'L mei ch'a peussa fe ii lo dio mi. Ch' a goarda dē sbignessla; d'andè, o 'd fe chërde ch'a l'è andait fora Stat; mi ii giutrai 'na man. Ant 'l mentre 'l process a va anans, a lo condano an contumacia, l'afè a s'andeurm, e chiel da si a dontrè ani a fa finta 'd nen, ass na torna tranquil com un papà.

FAUS. Tranquil fin a 'na mira.

ALFR. Basta avei dē dnè, al lo sà, tuti j afè a s'arango. Chiel, i son sicur, ch'a l'a nen fait 'l fol. Ch'am dia la vrità: a l'a pa lassaje vaire ai creditor?

FAUS. (*ridendo*) Tut lon ch'i l'ai nen podù portè via. Ant cousti ultimi di i l'ai ancora rabastà dèdsà

e dèdlà dontrè sold: insomma, un sentmila lirote j' ai tute.

ALFR. Ben stèrmà, e lontañe, a s'intend?

FAUS. A peul figuresse, i l'ai pensà a tut.

ALFR. Senssa ofendlo, Monssù Fausëtta, lon ch'a l'a fait a l'è da vero birbant.

FAUS. (*stringe la mano ad Alfredo*) Ch'am toca la man, Monssù Dësbèla, i stouma ben anssema.

ALFR. Dunque, cos na dislo 'd me consei?

FAUS. I chërdo ch'a l'è 'l pi bon. E chiel peui, le firme?

ALFR. Mi? Ii nego tute. Campo tut su chiel, le spale a j'a boñe. (Cosi im conservo la metà d'ii me beni: e i peuss ancora fe 'l sgnor abastanssa).

FAUS. Eco: chiel ass n'ampipa, e chi la bala son mi.

ALFR. Là! pèr nen ch'ass lamenta, i faroma parei. 'L quart a chiel 'd lon ch'am vanssa.

FAUS. E che garanssia 'm dalo?

ALFR. Ch'a studia com ai smia pi fatibil.

FAUS. Va ben: a l'è inteis. Ma 'ntratant cos l'aine da fe? Surti am conven nen. Mia ca l'è sarà, e con le lastre.

ALFR. Ch'a staga si. A jè pa gnun ch'a l'abia vèdulo a intrè ant cousta porta?

FAUS. I spero. Son curvime la faccia con 'l colet dël paltò. Sta neuit i l'ai durmì a ca d'un amis, Son fame mnè si an sitadiña, e a st'ora chi sa dova ass chërdo ch'i sia.

ALFR. (*fissandolo e sorridendo maliziosamente*) Ah! sta neuit a l'a durmì a ca 'd n'amis?

FAUS. Cos'ass chërdriilo chiel?

ALFR. *(come sopra)* Niente, niente. Ch'ass sara lì ant coula stanssa, *(indicando una delle porte a sinistra)* ii farai vischè 'l feù, e a so temp i disnoma. Antratant...

FAUS. Antratant i studiirai nostr proget, e la mei manera 'd ficheila a chi vanssa *(via)*.

ALFR. E così sia. *(riflettendo)* Ma! A forssa 'd fene tuti i grop a veño al pento. Dël resto, për mi ch'a s'arangia 'n poch, i veui pa sagrineme për lon.... I son giovo, pien d'anima, pien d'alegria. Che crussi? Che cure dla vita? L'amor e 'l piasì a devo esse i me soli compagn. E quand tut a sia sautà, quand i n'abia pi gnun? Eben allora i butrai testa a parti, e con me nom e me spirit i troverai quaich vidoa d'ii spron, caria dè dnè, ch'am manterà, e am farà vni galantom. *(leva di tasca un sigaro, e si appressa al fuoco per accenderlo)* Coul aso d'un Gioan a l'a lassà smortè 'l feù. *(suona il campanello che si trova sul tavolo)*.

Scena Quinta

GIOAN e detto.

Gio. Comandlo?

ALFR. Com vala che 'l feù a l'è dëstiss?

Gio. I voria giusta vischelo quand a jè intraje Mons-

sù Fausëtta. A l'è 'na minuta... (*si avvia verso il caminetto*).

ALFR. J elo vnuje quaichedun autri a sërcheme?

GIO. Nosgnor, cioè a jè dèdlà...

ALFR. Madama Trombet a l'è pa vnua?

GIO. Ancora nen, nosgnor. A jè dèdlà ant l'intrada 'na fia, ch'a l'è vnusse a smoñe pèr governanta. S'a cred 'd parleje...

ALFR. Ah! sì ch'i veui esse secà da le serve! Piila ti, s'a conven, mandla, fa com it veuli,

GIO. 'D volte peui ch'ai piaseissa nen...

ALFR. Fa ti, fa ti: mi veui gnuñe neuje.

GIO. Com a dirà. (*va presso il caminetto ad attizzare il fuoco*).

ALFR. (*accendendo un sigaro*) (Chi sa cosa l'avrà dit tota Angeliña dla létera ch'i l'ai faje portè da Madama Trombet? S'a l'è verament innamorà 'd mi, a farà lon ch'i l'ai die. Mi son già gonfi 'd lese 'd létere e 'd mandene; l'amor platonich quand a l'è n'ann ch'a dura, a finiss pèr stofie. Am pias coula tota, a l'è nen 'na maravia, ma tutun i l'ai avù pasienssa fin adess, pèrchè i saria content 'd podeila notè sul liber 'd mie aventure amorse).

GIO. 'L feu a l'è arangià. (*s'avvia per uscire*).

ALFR. Gioan...

GIO. (*si ferma*) Sgnor...

ALFR. Elo bela coula fia ch'a speta dèdlà?

GIO. Eh! pèr bela, sisgnor. A l'a 'n toch d'una grinta,

con doi eui ch'a fan feù. A dis ch'a l'a già servi
ant soa ca pèr doi ani.

ALFR. Doi ani? Chi ch'a peul esse? Ai na jè staine
tante.... Disie ch'a veña anans.

GIO. Li la mando subit.

ALFR. Scouta. Adess it vas peui a vischè 'l feù li ant
coula stanssa (*accenna la camera dove entrò
Fausëtta*).

GIO. Va ben. (*si avvia*).

ALFR. E dis: (*Gioan ritorna*) Che gnanca l'aria a sapia
che Monssù Fausëtta a l'è là. Se quaichedun
pèr asar a vneissa a sèrchelo, disie ch'a jè
nen, ch'a l'a mai butà i pe si, e cour subit a
dimlo. T'asto capime?

GIO. Sisgnor, sisgnor. (A jè propi quaich toiro) (*via
dal fondo*).

ALFR. Mi sai nen, stamatin, i l'ai n' agitassion, 'na
peña adoss, ch'i peuss gnanca spiegHEME. A
sarà pèrchè i son nen riposame abbastanssa.
Ciadess, s'am taca, torno andeme a cogè.

Scena Sesta

GIOAN, GHITIN e detto.

GIO. Là a jè 'l padron. Ch'a vada chila a parleje.
(*via a sinistra*).

GHIT. (*viene avanti francamente*) Cerea, Sor Alfredo.
Am conosslo pi nen?

ALFR. Oh! bela. Ghitin? Elo ti ch'it ses sì?

GHIT. Propi mi an corp e anima... Elo sempre stait ben?

ALFR. Benone. Da lon ch'i vëdo, t'ses senssa padron?

GHIT. Senssa 'd pianta, e i son vnua sì pēr sērchèmlò.

ALFR. Piite 'na cadrega e sette sì vsin al feu.

GHIT. (*prende una sedia e la porta vicinissima ad Alfredo*) Ai so ordin. (*siede*) Son vnua propi pēr asar, salo? A l'an dame la dresta senssa nom e cognom.

ALFR. Lassa 'n poch ch'it vëda. Contrari! com it ses fate bela. T'as cambià ben.

GHIT. Oh! i l'ai cambià sicur. Son papi tant gnoca, no; i l'ai pià 'l fe 'd sità. A l'è passà 'l temp 'd 'na volta, adess a l'è n'autr paira 'd manie.

ALFR. I vëdo ch'i t'as butà 'n po pi 'd deuit. Të smii gnanca 'na serva.

GHIT. J'assicuro, ch'im sento motoben 'd disposission pēr vni padroña.

ALFR. Dov sesto staita da dop ch'i t'as lassane?

GHIT. Ch'a, dia invece dop che bon'anima 'd soa man a l'a sbèrgiairame parei d'un can, pēr causa soa. Quand ii pensso am ven ancora caud. Oh! s'a fussa adess...

ALFR. Mia maman verament a l'è staita 'n po rudia.

GHIT. Autr che rudia!... S'arcordlo i doi sgiaf ch'a s'è dovusse suè?

ALFR. M'arcordo sicur... L'ai portane pēr eut di la marca an sla faccia. Dop allora sesto sempre staita ben?

GHIT. Oh! sì. I l'ai girà dapèrtut, e i trovava mai pan pèr i me dent. Stamatin peui son surtia da 'na ca, dova s'i fussa staita ancora 'n poch, i l'avria fini pèr meuire d'inedia.

ALFR. (*prende scherzando la mano di Ghitin*) Sesto dunque disposta a vni a serve con mi?

GIO. (*esce in questo punto dalla sinistra per dirigersi verso la comune, e fa un atto di sorpresa vedendo Ghitin seduta presso Alfredo*) (Uña davsìn a l'autr? E ben loli a fa piasì!) (*via*).

GHIT. Ch'a penssa! I spero nen autr. Basta ch'am pia!

ALFR. Veusto nen? I son anssi content che la combinassion a l'abia fane incontrè. T'ai vèdute quaich volta pèr lì, ma...

GHIT. Ma a s'è mai ancalasse fèrmeme. 'N po 'd gena, i capisso.

ALFR. Pitost ti, che...

GHIT. Oh! sì, mi? Veullo ch'i andeissa a ciapelo pèr 'l frach?

ALFR. Peùsto vni subit? T' sesto già 'n libertà?

GHIT. Libera com n' osel fora 'd gabia. S'a pèrmet, i vad a piè me baul, ch'i l'ai lassà a ca d'un'amia. (*si alza*).

ALFR. Va ben. Ven pura quand it veuli, toa stanssa a l'è pronta.

GHIT. A l'è n'afè 'd mes orèttà.

ALFR. (*s'alza egli pure*) Quant'a la paga, peui...

GHIT. Oh! dèl salari i l'ouma temp a parlène. (*guar-*

dando Alfredo con civetteria) S'a vèdrà ch'i lo servo ben, a l'avrà cognission.

ALFR. (*accarezzandole il volto*) Birichinota! T'm conossi già 'n poch.

GHT. (*ridendo*) E pèr un fructus, ma 'd coui a la preuva! Là, arvèdlo, Monssù!

ALFR. Ciao, Ghitin.

GHT. Cerea. Ch'a goarda: i son pi contenta dè vni a serve chiel, che s'i l'aveissa guadagnà 'n terno dopi. (*via allegra*).

ALFR. Guardoma com a s'è fasse bela coula fërfojota! 'Na volta a l'era gnoca, gofa com un sèber; adess a l'a butame sù 'na faciota impertinenta, e 'n deuitin ch'a 'nnamora. Ass vèd propi che l'aria 'd Turin a l'a faje ben. E mi, an mes a sti angëlet, i dovrai pieme 'd fastidi? Ma gnanca pèr seugn! Ch'a piora chi ch'a veul, mi fin ch'i peuss i veui rie.

Scena Settima

GIOAN e detto.

GIO. Monssù: a jè 'na sgnora ch'a lo serca.

ALFR. Chi ch'a l'è?

GIO. A m'a nen dimlo.

ALFR. It dovii ciameje, fabioch! Elo giovo?

GIO. Savria gnanca. A l'a 'l coefin tirà giù.

I Lader, ecc.

ALFR. Che gonfiada stamatin! Là! fala passè.

Gio. *(via)*.

ALFR. Un po coust, un po coul, i peuss mai stè 'na minuta tranquil.

Scena Ottava

GIOAN che ritorna, ANGELINA e detto.

Gio. *(fa passare Angelina, poi esce e chiude la porta)*

ALFR. *(avvicinandosi ad Angelina, che si sarà fermata al fondo)* Madama..... A chi l'aine 'l piasi?...

ANG. *(alza il velo del cappellino. È pallida ed abbattuta)* Alfredo!...

ALFR. *(sorpreso)* Tota Angeliña!... Chila ch'i vëdo? Ant mia ca? Che fortuna!

ANG. A dev'esse ben stupì, sicura, 'd vëdme vni ansisi sola e a st'ora.

ALFR. Am smia 'n seugn: i l'avria mai sperà tant. Ch'a chita 'l scial e 'l caplin, ch'a s'acomoda sì. *(avanza due sedie presso il caminetto)*.

ANG. No, no: i lo ringrassio. Mie minute a son contà, i l'ai pa temp a steme.

ALFR. *(con galanteria)* I pëmetrai nen che...

ANG. Ch'a pëmeta. I lo veni.

ALFR. Ch'a fassa com a stima. I spero però ch'a sia nè la gèna, nè la paura 'd mi, ch'a la teño tant an rigoard.

ANG. S'i l'aveissa avù paura, i saria pa vnua sola.

ALFR. Difati i l'avia dit a Madama Trombet, an dandie la lêtera, ch'i chërdo a l'abia armëtujer matin, (*Angelina accenna di sì col capo*) che se chila, tota, a s'arendia a le mie preghiere, e a piava la decision ch'a forma adess me bonheur, a fussa dasse la peña d'acom-pagnela.

ANG. Madama Trombet a jè mancaje poch ch'am com-promëteissa, përchè senssa lassësse vëde, a l'a consegnà la lêtera a 'na terssa përsöña.

ALFR. Cosa? Loli ch'a l'a fait? Oh! quand a veña si i savrai cosa die, ii ciamrai 'l përchè.

ANG. Ai ciamrà niente; prima përfeme piassi, secondariament përschivè 'l pericol 'd compromëtme doe volte.

ALFR. Ogni so desideri a l'è 'n comand përfmi. I parlarai nen.

ANG. I lo ringrassio, e 'd cheur. Vnoma adess al ponto prinssipal, al motiv ch'a l'a fame vnì si.

ALFR. (*affettuoso*) Qual motiv peullo essie, fora dl'amiccissia e dl'amor?

ANG. (*con dignità*) A s'ingana. Quantonque i l'abia dë stima, d'...amor përchiel, tutun jassicuro ch'a l'avria nen bastà përfinduume a coust pass.

ALFR. Ch'am scusa. A dirà forse ch'i son indiscret: ma soe parole am fan chërde, che chila a buta 'n dubi la mia sincerità... so rigoard.

ANG. Un autr dubi 'nvece, mila volte pi gross e pi brut a podria vnìe su me cont, s'i fussa dè-smentiamme al ponto d'agi e 'd parleje divers. Alfredo: jer la disgrassia a l'a batù a la porta 'd mia ca, e i l'ai vist me povër papà ant un stat ch'a l'a strassame 'l cheur. A l'è surti parei d'un mat, con le man ant i cavei, pioland e criand com un disperà. Jer seira a l'è tornà mut, concentrà e calm an aparensa, ma soa fisionomia e l'agitassion dël corp, a dinotavo la tempesta ch'a l'avìa ant 'l cheur.

ALFR. E qual elo cousta disgrassia, coust malheur così gross?

ANG. Ruinà!.... Assassina!.... A son le parole ch'a jè surtie da 'n boca. Dop ses ore d'inquietudine e d'agitassion i l'ai sèrcà 'd savei quacosa da me fratel, ch'a l'era 'ndaje apress pèr acompagnelo, ma a l'è stait tut inutil, l'ai podù savei niente, pèrchè papà a l'a proibilo 'd parlemne. Jer seira sul tard, pèr paura ch'a steissa mal, l'ai mai vorsulo chitè: la frev a lo travajava, a gemia, ass vèdia ch'ant l'interno a sufria immensament. L'ai sèrcà 'd consolelo, 'd pèrsuadlo; am ringrassiava con j' eui, ma soa boca a l'è sempre staita sarà. Finalment, vers mesaneuit a s'è andurmisse, e ant so seugn, tut convuls, a parlava 'd trufa, 'd faliment, a prononssiava 'd nom...

ALFR. Quai?...

ANG. (*guardandolo fissamente*) 'L so, Alfredo, fra j autri.

ALFR. 'L me?...

ANG. A l'è vnume 'n dubi teribil, i son risolvume, l'ai rilet soa ultima lêtera, e me parti a l'è stait pià. Sola, senssa serva, obligà dal me stat a seurte pèr andè a provède 'l necessari pèr la famia, i l'ai chità, sarà 'n quart d'ora, 'l let 'd me pare pèr vni da chiel, Alfredo. Chiel sol a peul spiegheme 'l misteri che da-jer an sa a l'a portà ant mia famia 'l disordin e la desolassion.

ALFR. Mi, jassicuro, i son sbalordì da lon ch'am conta, ma, ch'am chërda, i na sai meno che chila.

ANG. A l'alo confidà con quaichedun 'l segret 'd nostra corispondenssa?

ALFR. A gnun: ii lo giuro.

ANG. Allora, Alfredo, am resta mach pi da feje 'na preghiera e 'na domanda.

ALFR. 'Na preghiera a mi? Ch'a dia n'ordin.

ANG. Ch'am restituissa mie lêtere.

ALFR. (*sorpreso*) Tota Angeliña am ofend. Coule lêtere a son lon ch'i l'ai 'd pi car a coust mond, e...

ANG. (*con severità*) 'D pi che me onor?

ALFR. (*confuso*) Cos disla mai?... I l'ai vorsuje ben fin adess, e sempre 'd pi...

ANG. Sempre 'd pi ass pèrsuadrà ch'a l'è ora 'd butè 'n termine a coust stat 'd dubi e d'esitassion, che da 'na part a consuma mia salute e mia

vita, e da l'autra am manten ant 'l pericol
'd perde la riputassion vis a vi 'd me papà,
'd me fratel, d'ii parent e dël mond.

ALFR. (l' l'ai capila! Na fouma pi niente).

ANG. Ch'am renda mie létere, i lo prego.

ALFR. (*apre il cassetto di un nécessaire e ne estrae
un pacco di lettere*) Com a veul, tota. A sarà
mai dita ch'i contraria i so desideri. (*dà il
pacco ad Angelina che lo ritira con un sospiro*)
Adess am përmetrà ch'ii ciama, se dop la re-
stitussion ch'i l'ai faje, i sarai ancora aba-
stanssa fortunà d'avei mie létere custodie da
soe man?

ANG. (*leva di seno un altro mazzo di lettere, lo unisce
a quello ricevuto da Alfredo e li getta ambi-
due sul fuoco*) 'L sacrificissi a dev esse complet.
(Ah! com'i seufro).

ALFR. (Le létere amorose a fan tute coula fin). Tota
Angelina, com a vëd, i son stait pi che com-
piasent. Adess almeno ch'am spiega...

ANG. I spero ch'a l'avrà abastanssa dë spirit e aba-
stanssa 'd cheur përr avei capi tut. Se 'l so
amor përr mi a l'è sincer, s'a son nen finte e
busiarde le soe promësse, i giurament ch'a l'a
fame, eben ch'ass decida 'na volta. La parola
d'un galantom a l'è sacra, ch'a la manteûa
e ch'am fassa soa founna.

ALFR. (Fola s'it lo pensi!)

ANG. Eben, cos'alo? Am rispondlo pi nen?

ALFR. Ii dirai: 'na risolussion 'd tanta importanssa ass peul pa piasse così facilment.

ANG. (*ironica*) A l'a avù n'ann 'd temp a penseje.

ALFR. Mi ii veui ben verament, i dio pa 'd nen sposela, ma...

ANG. Ma, i lo capisso: a vorria ancora tnime sciava, feme penè, vèrsè 'd lacrime, e chissà fin a quand. Ah! Alfredo: s'a fussa 'n po ant mi, quand me papà e me fratel a m' ambrasso, fasend d'ii cont, fasend 'd seugn su me avni, quand dle giornà 'ntreghe, dle seire eterne, fissa su me travai, i pioro, i sospiro, pensand mach a chiel, a provria l'afann ch'am oprim, 'l dolor ch'am rusia, la gelosia ch'am divora. Oh! meuire, sent volte meuire, pitost 'd seguitè a soportè coule peñe e coule torture!

ALFR. Ch'ass tranquilisa. A l'è pa 'l caso 'd sagrinnesse parei.

ANG. Alfredo, a l'a senti la domanda ch'i l'ai faje; ch'a sia dunque franch e sincer. Qualonque a sia soa risposta, ii promëto ch'i savrai rispetela.

ALFR. Ch'am përdonà, tota, chila ass fa le cose trop brute, ass fa 'n quader trop spaventos 'd soa esistenssa futura.

ANG. (*con dignità*) I l'ai faje 'na domanda: la risposta qual ela?

ALFR. Quand a l'è parei. posto ch'a veul, ii dirai...

Scena Nona

GIOAN e detti.

GIO. Monssù: a jè vnuje doi sgnori, ch'a ciamo 'd parleje.

ALFR. L nom?

GIO. Monssù Merlati e so fieul.

ANG. *(con un grido)* (Me papà!)

ALFR. Possibil! *(sorpreso e confuso)* Faje spetè 'n moment.

GIO. Sisgnor. *(via)*.

ANG. *(tremando)* Alfredo, pèr pietà! ch'am salva, o i son 'na fia perssa!

ALFR. Ch'a l'abio vèdula?... Savulo?... Cosa l'avranne da dime?

ANG. *(come sopra)* A l'è inutil supoñe. Ch'am stërma. ch'am salva, i lo prego!

ALFR. Là, lì, ant coula stanssa. *(indica la prima porta a destra verso il proscenio)* Ch'a sè sburdissa nen, e ch'a conta su mi.

ANG. Alfredo, ch'ai penssa: me onor a l'è ant soe man. (Ah! mio Dio. Cos' i l'aine mai fait!) *(via in fretta a destra)*.

ALFR. Stamatin am càpito tute. A smia tost un romans. Autr che andè a deurma! Am dèsvio pro d'un bel andi. Là! corage, e sentioma sti doi. *(suona il campanello, comparisce Gioan)*

Fa vni anans coui doi sgnori. (*Gioan via*) Ch'a dio lon ch'a veulo. A la fin d'ii cont a l'è vnuu chila 'd soa spontanea volontà. A l'è pi nen una teta, l'età dël giudissi al l'a tuta.

Scena Decima

GIOAN, MERLATI, GIOACHIN, ALFREDO
e a tempo FAUSETTA.

GIO. (*introduce Merlati e Gioachin, poi via*).

MERL. (*la sua fisionomia è stravolta*) Ch'a scusa, Monssù, s'i souma piasse la libertà dë vnìlo a dëstorbè tant 'd bonora, ma la rason a l'è così forta ch'a servirà pèr fene compati.

ALFR. Ma che compati? A qualonque ora a son sempre padron. (A m'an nen l'aria d'esse infurià).

GIOA. Soumā già stait doe volte, uña jer dop disnè, e l'autra vers seira.

MERL. Ma i l'ouma nen avù 'l bonheur 'd podeije parlè.

ALFR. Oh! Am rincress tant. Jer, pèr combinassion, i son stait fora 'd ca tut 'l dì. Coul sventà 'd me domesti, pèr autr, a dovia dimlo.

GIOA. Ai fa pa nen. A sarà dësmentiassne.

ALFR. (Da lon ch'i vëdo, a son nen vnù pèr la fia). Ch'ass dago dla peña d'acomodesse, ch'a stago nen genà, ch'a poso so capel. (*Merlati e Gioachin mettono il cappello sulla tavola, poi seggono. Alfredo a destra, Merlati nel mezzo, e*

Gioachin a sinistra) Qual elo 'l motiv ch'am procura 'l bonheur 'd fe soa conossensa?

MERL. Monssù Dësbèla, ch'am guarda. A vëd ant mi n'om fora 'd chiel, un pare 'd famia disperà. Jer a l'è mancaje poch ch'am gireissa la testa, e ch'i feissa fin d'ii me di.

GIOA. Papà, dis nen lon, tranquiliste: a l'è inutil andè fora d'ii feui.

ALFR. Am fa peña 'l so stat, ma...

MERL. Ma a capiss nen 'l përchè 'd couste mie stravagansse? A l'a rason. Ch'am përdona, i l'ai la testa tanto lorda, le idee così confuse, ch'i sai pi nen cosa ch'im fassa, nè cosa ch'im dia. Me nom, Merlati, quantonque i l'abia mai avù la fortuna d'avsinelo, i veui sperè ch'ai riessa nen neuv.

ALFR. Neu, verament no. A l'è però la prima volta ant coust ponto ch'i lo conosso personalment.

GIOA. A l'è giusta lon ch'i l'ai die a me papà.

MERL. Ch'a senta. Mi l'ai 'n dubi teribil, e 'na speranssa ant 'l istess temp, ch'am dà 'ncora un po 'd forssa a suportè mia disgrassia. Se cousta speranssa a doveissa abandoneme, se coul dubi a doveissa vnì realtà, i sai nen die cos'a na saria 'd mi; lon ch'a l'è certo, i saria l'om pi infelice dla tera.

ALFR. Elo che mi peussa gioveje ant quaicosa? Ben volontà.

GIOA. Chiel a peul...

MERL. No, Gioachin, speta. Lassa ch'i viva ancora 'n moment ant l' ilusion e ant 'l dubi.

GIOA. Parla, papà. Loli at fa 'ncora pi mal.

MERL. I parlarai, i parlarai. *(esitando colla voce tremante)*
Monssù Dësbèla... Un ann e mes fa l'alo nen pià 'n prestit da mi trantesinch mila lire?
(tiene gli occhi fissi su Alfredo).

ALFR. Da chiel?... Prima neuva. I l'ai mai fait loli.

MERL. Mai?! *(impallidisce e gli cascano le braccia).*

GIOA. Papà, cosa 't sentësto? At venlo mal, papà?

MERL. *(colla voce soffocata)* No, Gioachin... A l'è niente.

ALFR. *(fa per suonare)* Ch'ii fassa portè quaicosa?

MERL. No, no, i lo ringrassio. Un po 'd peña al cheur.
'n po 'd caud a la testa... A l'è tost passame.

ALFR. (I l'ai capila! A l'è un 'd coui 'd Fausëtta. Si a bsogna tni bon).

GIOA. Stasto mei?

MERL. Si, si, i stagh benissim. Adess, Sor Cont, s'a përmët, ii fass ancora 'na domanda.

ALFR. Quante ch'a veul. I son sì përispondie.

MERL. A conöss ben Monssù Fausëtta?

ALFR. S'i lo conosso? Pur trop! Un birbant, eh'a l'a sèrcà 'd ruineme, ch' a l'a fait bancarota, e che valendsse dla procura general ch'i l'avia passaje përfè tutti i me afè, a l'a abusane, fasend 'd firme fausse, e adossandme d'ii debit ch'a incontrava përfè so cont e vantage, 'l so, përfè esempi, mentre mi n'avia e i n'ai gnanca l'idea. (Am conven lesie la vita).

FAUS. (*comparisce in ascolto alla porta a sinistra*).

MERL. (*sospira*).

GIOA. Corage, papà! A l'è fatta: sagrinte pi nen.

MERL. (*sorridendo con amarezza ed ironia*) A passava però pēr un gran galantom!

ALFR. Pēr 'l re d'j omini. Tuti a corio a porteje dē dnè, a n'aveisslo volsune! Guai a parlene mal pēr li! Eben, adess vèdlo? Elo ancora 'l caso 'd fidesse 'd quaicun?

MERL. A l'alo parlaine dē sto debit?

ALFR. A l'a mai dime niente.

GIOA. Veul di che chiel a lo ignora 'd pianta?

ALFR. Completament.

MERL. Elo dispost a riconosce le firme?

ALFR. Le mie, senssa dubi, le fausse mai. pi.

GIOA. (*si alza*) A giudieran i tribunai.

ALFR. (*alzandosi egli pure*) Ch'a giudico pura, i farai valei mie rason.

MERL. (*che a stento si sarà rimesso in piedi*) Andoma, Gioachin; sì drinta i l'ouma pi niente da fe.

ALFR. (*con finta bonomia*) Am rincress 'l sangh dël cheur a vède che 'na pèrsoûa tant onesta, tanto boña come chiel, a sia stait inganà, trocionà pēr parei. I vorria podei rimediè, podeilo vède tranquil; ma disgrassiatament i l'ai trop da pensè pēr me cont. Dco mi son pëssià d'una bela manera. Metà d'ii me beni a l'è caria d'ipoteche, e i l'avrai ben da fe pēr gaveme coul peis.

MERL. *(si mette il cappello come smemorato)* Mi 'ntant i son an malora, mia famia a l'è ruina, am resta pi niente.

GIOA. Cosa pensësto mai? A l'è pa dita che tut a sia pers. La ca, la roba, i beni a l'è pa podussie portè via 'n sacocia. La causa a 'ndarà anans, ass farà 'l giudissi, la liquidassion, e...

MERL. E i piiroma 'l quindes o 'l vint pèr sent a l'ingross, con 'l pat ancora ch'ì peusso arivè a fe riconosce nost credit. Antramentrè iss mangëroma i pugn e i traondroma le lacrime.

GIOA. Ven, papà, scoutme mi: pensie nen, a l'è mei.

ALFR. Ch'am scusa, Monssù Merlati, s'ii dio lon ch'ii dio, ma chiel a l'a agi verament da bonom. Prima dë sborsè 'na somma 'd tanta importanssa a dovia almeno informesse, vnime a parlè, esige mia presenssa quand a fasia l'istrument.

MERL. A l'a rason, a l'è vera: tut 'l tort a l'è me. Ma salo chiel i ragir, le faussità, le promësse ch'a l'a dovrà pèr tireme a coul ponto? S'ì j dieissa bin a vorria gnanca chërdie. I son fidame pèrchè soa procura a l'era an tuta regola e senssa ecession; pèrchè n'autr povër diao, confident parei 'd mi, a l'era dco là ant coul moment a versè i risparmi 'd des ani; pèrchè i l'avria daje 'l cheur a guernè; pèrchè le manere, la figura, le parole, a l'avrio fait chërde che 'l galantomism e la virtù a fusso dassa la man pèr concentresse ant coul om. Ma invece souta 'l

mantel dël galantom a stërmava la man e le intenssion dl'assassin.

GIOA. Papà! pèr carità.

MERL. Assassin, sì! e pes ancora sent volte, pèrchè almeno l'om pèrdù ch'a afronta la gent an s'na strà a risiga la vita; mentre cousti ambrojon rafinà, cousti bancarotiè, cousti lader an guant bianch a specolo ans la ruiña dle famie; a fan serve lè studi, l'educassion ch'a l'an ricevù, a dann dla società, pèr riussì ant i so fin; a dilapido, a sialaquo ant 'l vissi i sudor d'ii malheureù che la fatalità, 'l destin a l'a butà an so poter. (*piange*).

GIOA. Ven, papà andoma! I veui pi nen ch'it sagrini.

ALFR. (Am strens 'l cheur, parola d'onor! ma pura, cosa feje?)

GIOA. Andoma a ca. Angeliña a sarà già 'n peña pèr ti.

ALFR. (A l'è an peña sicur).

MERL. Ah! se coul infame a l'aveissa pensà a le conseguensse dël mal ch'a l'a fait, i son sicur ch'a l'avria nen avù tant corage. Ancora jer matin, mentre jero li tranquii pèr butesse a mangè 'n bocon, a l'è vnù tut an lusso, con i so guant a la man, franch, alegher, con 'na facia rienta, a conteme che chiel a l'avia comprà 'na cassiña....

ALFR. Mi?...

MERL. Ch'ai mancava tre o quat mila lire pèr compì 'l pagament. E mi, imbecil, i son stait tanto

imprudent, tanto bestia da chërdie ancora 'na volta, e 'd lasseme portè via l'unica arsorssa ch'am resteissa, i dnè ch'i conservava religiosament pèr butè 'l rimpiassant a me fieul, pèr feje seguitè soa cariera, che pèr causa mia a sarà distruta pèr sempre.

GIOA. Pensa nen a mi, i son 'giòvo, i seguitrai me destin.

ALFR. Ah! coula li, pèr esempi, a l'è staita da vero birbant.

MERL. A sarà scapà, a sarà 'ncora a Turin, i lo sai nen; ma se la fatalità a feissa ch'i lo incontreissa pèr li, i chërdo che 'l sangh am faria furia a la testa, la rason am abandonria, i dësmentiiria d'esse pare, e i lo stran...

FAUS. (*impaurito si nasconde subito*).

GIOA. Papà!

ALFR. Monssù Merlati!

MERL. (*a Gioachin, frenandosi*) T'as rason, t'as rason. I son mat! Surtioma, i l'ai bsogn d'aria. Si drinta ass sofoca. Ven, Gioachin, ven, e pèrdona a to pare, che pèr soa colpa a l'a formà 'l to malheur. (*via desolato seguito da Gioachin*).

ALFR. Maledeto Fausëtta! Pèr causa soa am toca surbime couste scene. I l'ai mai fait una fatiga simil. Adess pensoma a st'autra. (*si dirige a destra*).

Scena Undecima

FAUSETTA e detto.

FAUS. Ma bravo! Benissim! Im chërdia mai pi ch'a fussa 'n bulo parei. L'ai senti tut. A l'a comenssà ben; s'a seguita a neghè con j'autri con l'istessa franchëssa, l'afè a va d'incanto.

ALFR. Ciuto! Ch'a staga chiet. Ch'ass fassa nen sente: a jè 'd gent dëdlà. (*indica a destra*).

FAUS. (*a mezzà voce*) Chi ch'a jè?

ALFR. La fia 'd coul ch'a l'a fait 'd chiel mach adess un panegirich tant bel.

FAUS. Oh! là. J'elogi a vnisio mes a pr' un. Ma couma si soa fia?

ALFR. Son nen cose ch'a lo interesse. Ch'ass sara ant' coula stanssa e ch'a banfa pi nen.

FAUS. I vad, i vad. Ah! s'i peuss fela franca, e scapè da Turin...

ALFR. Ch'a taca 'n bel vout. A l'a senti: s'a lo incontro a jè 'l col ch'ass na mëscia.

FAUS. Virgola! (*rientra in fretta nella sua camera*).

ALFR. Là! procuroma 'd mandè via chila sì. (*si avvia verso la camera dov'è nascosta Angelina*).

Scena Duodecima

ANGELINA e ALFREDO.

ANG. (*esce pallida e stravolta, reggendosi a stento*).

ALFR. Tota Angeliña, ch'a veña. A jè pi gnun pericoi.
(*fa per prenderle la mano*).

ANG. (*ritirandola con rabbia e dignità*) Mai! Im macèria pèr sempre s'i tocheissa soa man.

ALFR. Cosa ch'a dis? Cosa ch'a l'a?... Pèrchè ch' am-trata parei?

ANG. (*indicando la porta dove entrò Fausëtta*) La pèrsoña ch'a jè intraje là drinta...

ALFR. (*A scoutava a la porta!*)

ANG. A l'è trista, a l'è infamè: ma chiel a la sorpassa 'd gran longa.

ALFR. Tota: i son nen usà a sentime ingiuriè. Le parole ch'a pronunssia a son nen da pèrsoña educà.

ANG. (*si pone la destra sul cuore come per soffocarne la pena*) A dis ben, a l'è giust: l'ai pèrdù 'l me decoro, la stima dèl mond forse, dal moment che 'l me bon angel a l'a abandoname e la folia a l'a fame vni si! I lo vèdo, sì drinta a l'è la ca dl'ignominia, dèl tradiment e dla crudeltà.

ALFR. Tota Angeliña!...

ANG. Dla crudeltà, i lo ripeto: pèrchè quand a s'ariva
I Lader, ecc.

al ponto 'd tradi, d'inganè 'na povra fia, 'd vède 'n pover pare ruinà, disperà pèr causa nostra, a piorè, a strassesse i cavei, a sufri le peñe dl'infern; senssa vèrsè 'na lacrima, senssa sente 'n rimorss, con 'l rie sui laver e la giassa ant 'l cheur, a bsogna di che l'anima a l'è pèrdua e la cosienssa a l'è morta!

ALFR. Ch'a dia: mi son stofi 'd sente a criè e 'd sente 'd prediche. Ch'ass na vada: a la fin fin i son nen andait a sèrchela.

ANG. Ancora j insult! I vad, sì, e, grassie a Dio, an temp pèr dèscheurve tut e vendichè me papà!
(*si avvia per partire*).

ALFR. A dèscheurvrà niente, a parlrà nen, i na son pi che sicur.

ANG. (*fermandosi e con forza*) Si ch'i parlrài. Veullo forse impedimlo?

ALFR. Se chila a parla, i parlrài deo mi.

ANG. A jè le preuve, 'l neghè a basta nen.

ALFR. (*freddamente e con ironia*) I dirai che la tota a l'è vnume a trovè, ch'a l'è staita n'ora ant mia stanssa. (*leva di tasca due lettere*) I farai vède soe lètere.

ANG. (*con un grido, coprendosi il volto colle mani*) Ah! infamia. Fiña 'nt lon a l'a inganame!

ALFR. (*riponendo le lettere*) Couste doe ii tnisia pèr memoria. Com'a vèd, ai conven 'd pi a chila a ste chieta.

ANG. (*costernata*) L'ai fait un pass fauss, l'ai fait mal,

mio Dio! ma 'l castigh a l'è trop fort, la penitenssa trop grossa! Alfredo, ch'a scouta l'ultima parola d'una creatura ch'a l'a volsuje tant ben, a l'è ancora an temp: ch'a l'abia pietà 'd 'na povra famia, ch'ass pentissa e ch'a ripara soa colpa.

Scena Tredicesima

GHITIN, e detti.

GHIT. Monssù, i son 'd ritorn. *(viene avanti francamente e si trova faccia a faccia con Angelina).*

ANG. *(sorpresa)* Ghitin!

GHIT. Tota Angeliña!

ALFR. *(Ass conosso?!)*

ANG. Ansisi?

GHIT. Son a ca 'd me padron.

ANG. *(guardando Alfredo)* Chiel!

GHIT. Propi chiel. E chila? *(con malizia)* Cosa fala sì?

Ah! i capisso... Im na ralegro ben tant.

ANG. Fiña jinsult 'd coui ch'i l'ai lèvà da 'na strà, ch'a l'an mangià 'd me pan!

GHIT. S'i l'ai mangialo i son deo guadagnamlo. Jer a l'a mandame via pèr 'na colpa sognà, mentre chila...

ANG. *(con disprezzo e forza)* Alfredo: 'l so silenssio a dinota viltà. A s'ancala nen trovè 'n mes termin, prononssiè 'na parola pèr difende 'na

povra infelice, che gnun mei che chiel a sa
s'ass merita compassion e rispet.

ALFR. (*per avvicinarsi ad Angelina*) Ch'a scouta...

ANG. Andarè! om senssa cheur. (*indicando Ghitin*)
Eco la pèrsoña ch'ai conven. Ch'a viva felice
s'a peul... (*soffocata dal dolore e dalle lacrime*)

Mi, miserabil, avilia, desolà, i peuss almeno,
lon che chiel a peul nen, portè la front auta, i
peuss ancora dime: povra fia! t'as amà d'amor
franch e sincer; t'as amà e t'as sufert, ma
toa cosienssa a l'è pura e senssa rimorss. I ri-
morss ai veño a chiel, Alfredo, e ch'a pensa
che Dio a paga nen 'l saba! (*via come for-
sennata*).

GHI. (*ridendo*) Chila li a l'è mata!

ALFR. (*alza le spalle con noncuranza, e via nella sua
camera*). (*Gala il sipario*).

Fine dell'Atto secondo.

PROPRIETÀ di
RINETTI FORTUNATO

Via Berthollet N. 16

TORINO

ATTO TERZO

Camera povera. Porta comune al fondo nel mezzo. Un armadio pure al fondo a sinistra. Un letto a destra mascherato da un paravento. Una tavola davanti, sedie, ecc. Finestra a sinistra. A destra porta della camera di Merlati. A sinistra, accanto alla finestra, porta che dà adito ad un'altra camera.

Scena Prima

ANGELINA poi GATIN.

ANG. *(pallida e dimagrita sta ricamando seduta presso alla finestra. Si batte alla comune. Angelina si alza e va ad aprire. Entra Gatin).*

GAT. *(con premura)* Eben? Com vala?... Son vnù a piè 'd neuve. I seurto adess da l'ufissi.

ANG. Sempre mei. Jer a l'a volsù ste lvà tut 'l di, e da si 'n poch i chërdo ch'a veuja torna fe istess.

GAT. A l'a fait mal. A dovria ste cogià. A peul torna ricade. A l'è vera, ch'ant 'l meis 'd lui, con 'l caud e 'l ciair 'd luña ch'a fa, a amusa nen vaire ste a fonde ant 'l let; ma tutun ai va 'd pasienssa, a bsogna sufrì 'n mal pcit pèr

evitene un pi gross. E chila, boña donëtta, cosa ch'a l'a stamatin ch'a l'è tanto splufria?

ANG. I sai gnanca mi. Son lvame 'd bonora pèr andè a vède se papà a l'avia bsogn 'd quaicosa; a fasia 'n tuff insoportabil, i l'ai pensà ch'a l'era inutil torneme a cogè, son butame si a fe quaicosa, e a l'è vnù di senssa ch'im na sia acorta.

GAT. (*fissandola*) Tota Angeliña, ch'am lo nega nen: chila a l'a passà la neuit a travajè?

ANG. (*china la testa senza rispondere*).

GAT. (*commosso*) (Povra fia!) A fa mal, tota, a fa mal a fe parei. A la fin d'ii cont a son pa 'nt la miseria. So papà a l'a soa paga; a l'è pcita, a l'è vera, ma pasienssa! o ben, o mal, a jè sempre da vive. Mi, perbaco! i conto dco quaicosa. Pèrchè donque strapassesse, guastesse la salute 'd coula maniera? Com elo ch'a 'ndarà pèr so povèr papà, se pèr malheur a vneissa dco chila malavia? A bsognria ch'i vneissa mi a feje 'l panpist e a cudie tuti doi. Tota, ch'am chërda, ch'a lo fassa pi nen.

ANG. Me travai a l'è necessari.

GAT. Util, i lo capisso: ma tuti i trop a son trop.

ANG. Povèr Monssù Gatin, che bon cheur ch'a l'a! Quant interesse a pia a nostre disgrassie! A l'è propi l'unich amis ch'i l'abio. Fiña i parent a nē schivio da quaich temp a sta part, an resta mach pi chiel.

GAT. A sala nen che i mei parent a son coui ch'i l'ouma an sacocia? Eh! mia cara: fin ch'a jè 'd monede, ch'ass fa bela figura e a s'i jam-piss la panssa quaich volta, ass peul stesse sicur ch' a son sempre ant le gambe; ma se la fortuna a cambia, s'ai riva 'l malheur, allora tuti a dobio le sòle, av leso la vita, e a fan 'l gir dël canton pèr paura 'd doveive ancontrè.

ANG. A l'è pur trop una dura vrità! Ma neh? Monssù Gatin, ant che trista condission iss trovoma! Che diferenssa da eut meis a sta part! J ero là ant coul bel aloget tranquii, felici, content 'd nost stat. E adess, pèr doe pèrsoñe captive, pèr la boña fede 'd me papà, iss trovoma sì ant cousti tre pèrtus; me fratel soldà, forse mort; mi obligà a gumè da n'alba a l'autra; papà malavi da quindes di, e an' pericol ancora, se la maladia a dura, 'd perde con la salute l'impiegh. Ah! Nostsgnor a l' a propi abandonane 'd pianta.

GAT. Ma! 'D volte ass na vèd 'd coule ch'a fan diventè i cavei gris dnans temp. A bsogna nen ch'i pensa a la sorpreisa e a la rabia 'd so papà e a la mia, quand i l'ouma savù che coul blagheur 'd Monssù Dësbèla a l'era complice, socio 'd coul impostor d' un Fausëtta, ch'a l'a avù mezzo e manera dë scapessne an America. E pensè che Monssù Dësbèla a

spassëggia 'ncora i porti con la sigala an boca, riendse dël mond!... A son cose da vni mat. Ma ch'a staga tranquila, tota, l'ai nen durmì fin adess. A la fin d'ii cont a son sempre la vrità e la rason ch'a trionfo. S'a fussa divers, a bsognria di che la giustissia a l'è morta.

ANG. Ch'a dia 'n poch: elo passà a la posta? Elo andait a piè 'd neuve al Ministero dla guera?

GAT. Son stait dapertut. 'D letére gnuë, al solit, e al Ministero a l'an savume di niente. A jè sempre 'n mondass: un ciamà 'd coust si, l'autr a ciamà 'd coul là; j'impiegati a guardo, a scar-tabèlo, a serco, e pèr nen fe tort, a dio a tuti l'istess.

ANG. Cosa ch'a dio?

GAT. «I na savoma 'd niente. Ch'a torno doman.»

ANG. A mē smia impossibil. A son quindes di ch'a jè staje la bataja; la pas a l'è fatta, tut a l'è tranquil, e nen 'na létera, nen 'na neuva ch'an consola, ch'an dia s'a l'è viv, s'a l'è ferì, se... (*angosciata*) Oh! che 'd trop. Me povèr fratel a l'è mort!

GAT. Ciuto, pèr carità! ch'am strensa nen 'l cheur parei. Ai n'a jè restaine d'ii bei, a l'è vera, ma l'è pa dita che Gioachin a sia dco chiel ant coul numer. Finalment e peui s'a l'a nen scrit ch'a l'è viv, a l'a dco nen scrit ch'a l'è mort.

ANG. (*con un sospiro*) Fortunà chiel ch'a peul ancora facessìè!

GAT. I facessio, pèrchè i son tranquil che coul brav fieul a l'è nen stait disgrassià al ponto 'd finì i so di a San Martin. A l'a scapala a tute j'autre bataje, dov a son dasse 'd lècche da borgno; e i son persuas che, ad onta 'd so silenssio, a l'è ancora ardì, fresch an sla piota, con so caplot an sl'oria e le piume 'd capon ch'a volo. A l'è 'n børsaliè d'ii pi bei.

ANG. Antratant papà a dà giù a vista d'eui, a l'a mach pi la pel tirà 'nsima a j oss, i lo treuvo sempre ch'a piora e ch'ass magoña. I sai pro a chi ch'a pensa. Jer, pèr consolelo, l'ai fiña die 'na busia..... L'ai die che chiel, Monssù Gatin, a l'avìa savù 'd neuve, che Gioachin a stasia ben.

GAT. Ancora pro! L'alo faje piasì?

ANG. (*tristamente*) A l'a guardame fissa fissa 'n moment, e peui a l'a dime con un rie ch'a l'a sesime 'l cheur: e allora pèrchè nè a ven nè a scriv?

GAT. Oh! bela. S'a podeissa 'n po nen. Ch'a guarda, tota, am sagna 'l cheur a vède so papà ant coul stat; i sai nen cosa ch'i faria pèr consolelo, ma lon ch'a l'è vera a va dit: S'a l'aveissa scoutame mi, s'a l'aveissa volsù acetè coul poch ch'i l'ai ofrie, tuti j afè a sario stait arangià.

ANG. Chiel a conoss me papà, a sa com a la pensa. Ch'a lo rimprovera dunque nen, se forse pèr trop scrupol, pèr paura 'd nen podei a so temp sodisfè a l'oblig ch'a incontrava con chiel, a l'a rifudà 'l socors d'un amis generos.

GAT. A l'a propri dit ben: scrupoi, pa nen autr che scrupoi. I l'aine forse fissaje d'epoche, mi, e ciamaje quaicosa? Pretendù quaich assicurasion? J era bienès 'd [prèsteje tut coul poch ch'i possedo. A l'avria restituimlo quand la fortuna a l'aveissa mostraje la faccia 'n po pi grassiosa. E coul temp a s'avsiña, sala? Ii dio nen 'd pi. Ancheui a l'è 'na gran giornà, 'na giornà decisiva. S'j arivo a vince dco mi la bataja che da ses meis i sosteño, allora doman...

ANG. (*concentrata*) Doman a sarà pi trist ch'ancheui.

GAT. Cosa ch'a veul scomètte che doman chila a rii com 'na mata? Che si drinta la malinconia a 'ndarà con le gambe an aria, pèr lasseje 'l post a la contentèssa e al piasì?

ANG. (*alzando gli occhi al cielo*) Povèr Gioachin!

GAT. Gioachin a scrivrà. Gioachin a l'è viv, i lo sai, i sento 'l cheur ch'am lo dis; e mi ant loli i son come le founne, ii chërdo sempre. A vèdrà lon ch'ii dio. Si drinta 'd disgrassià ai na sarà mach pi un, e coul là i sarai mi.

ANG. Chiel?

GAT. (*con un sospirone*) Ah! pur trop, mach pi mi.

- ANG. Për che motiv? Përchè sospirlo parei?
- GAT. Eh! Coul sospir a veul di tante cose.
- ANG. (*melanconicamente*) Cosa ch'a veul di?
- GAT. (*confuso come al solito*) A veul di che da 'n pess...
Chila... A deurmlò ancora papà?
- ANG. I penso che 'd si. A l'è tanto debol! (Povër fieul!
I lo capisso pro).
- GAT. (A l'è inutil, i son bon a di niente). (*guarda l'orologio*) Oh! mi povr om. A son ondes e mesa. A bsogna ch'i scapa. Vad a piè 'n bicerin al Cafè Baron, peui torno al telonio.
- ANG. A veullo nen vède papà?
- GAT. No, no: lassomlo tranquil. I torno peui a vni.
- ANG. Jer a l'a dco dime lon, peui a l'a mancà 'd parola.
- GAT. Jer a l'era n'autr cont. Ancheui i tornrai për porteje 'd boñe neuve.
- ANG. A fusslo vera! Ch'a guarda, Monssù Gatin: se quand a torna am porta 'na létera 'd me fratel, ii promëto....
- GAT. Cosa? Ch'a dia...
- ANG. Tuta la mia riconossenssa.
- GAT. (*contento*) I spero 'd meritemla.
- ANG. Ch'a veña donque a consoleme al pi prest.
- GAT. Për consolela, tota Angeliña, im ficria ant 'l feù, i daria la mia vita. (Për un impiegato 'd Finansse i son stait abastanssa poeta). (*via*).

Scena Seconda

ANGELINA sola.

ANG. Che diferenssa tra cousta boña creatura e coul
essere trist, ch'a formava 'na volta l'ideal d'ii
me pensè! Son eut meis che coula scena oribil
a l'a rompume 'l fil 'd tute le speransse. Adess
i son povra; pèr causa soa am resta pi niente
a coust mond che 'n pare disgrassià. I l'avìa
ancora 'n ben, l'apogg 'd me fratel, ma coul
ben lì i l'ai dco forse pèrdulo; forse ant coust
moment a l'è freid, cuvert 'd tera, bagnà da
so sangh... (*piange*) Oh! bon Dio, fe ch'i m'in-
gana, ch'i peussa 'ncora vèdlo, ch'a peussa
'na volta 'ncora vnì ant ii brass 'd soa povra
sorela.

(*La voce di Merlati di dentro*) Angeliña! Angeliña!

ANG. Papà 'm ciama. Andoma a vède lon ch'a veul.
(*via a destra*).

Scena Terza

GHITIN abbigliata con gran lusso, ALFREDO,
poi ANGELINA e Monssù MERLATI.

GHIT. (*sulla porta*) Ven, ven, Alfredo: a l'è si. (*viene
avanti*) A jè gnun. Auff! che caud. (*siede*) I son
straca morta.

ALFR. (*guardando attorno dal fondo*) A valia la peña 'd feme montè al quint pian. (*arrabbiato*) A l'è 'n bel post sì, pèr vni a ordinè 'd travai! Quaich pitoca ch'a l'a gnanca da mangè.

GHI. Là! a j elo 'd motiv da criè pèr loli? S' i t'as caud, sofia com i fass mi. Oh! bela. L'ai volsù provè pèrchè a l'an dime ch'a l'è uña dle mei lavorante. (*si alza*) Oh! dla cà. J elo gnun?

ANG. Chi ch'a serco? (*con un grido riconoscendo Alfredo e Ghitin*) Ah! Chiel?

ALFR. (*sorpresa*) Angeliña!

GHI. (*senza scomporsi*) Cosa, cosa? Chila, tota, ch'i treuvo sì? Ch' i sio forse falisse? J ero vnù pèr sèrchè 'na dona ch'a fa 'd camise, 'd ricam, ch'a broda 'd cotin. A jè 'l cartel tacà a l'uss.

ALFR. (*per partire*) Senssa dubi, l'ouma pià 'na porta pèr n' altra. Ch'a scusa.

ANG. (*ironica, fissando Alfredo e Ghitin*) No, no, a son nen sbaliasse. A l'è propi cousta la ca 'd coula ch'a serco. Son mi ch' i cuso e ch' i brodo pèr vive.

ALFR. (*confuso*) J acerto, pèr autr, ch' i l' avria mai supost...

ANG. D' incontreme mi? I lo chërdo. Ma vèdme ant- coust stat a dovria nen sorprendlo. Niun mei che chiel a peul saveine la causa. Pèr part mia peui j assicuro, ch' i l' avria mai e peui mai

podù chërde che, con soe idee tant grandiose, a l'aveissa fait padroña la serva.

GHIT. Ai falo peña loh? Veulla ch'i veña a piè jordin da chila? A son passà coui temp. Adess i son mi ch'i comando.

ALFR. (*piccato*) Margritin, it avertò 'd moderè le parole. A podria capitete lon ch'a jè capitaje a quaichedun'autra.

ANG. (*con collera e disprezzo*) I lo prego 'd fe atension, ch'a l'è ant mia ca! Le soe parole a son un neuv insult, 'na neuva ingiuria ch'am fa.

ALFR. Pèrchè ch'am dis lon?

ANG. Perchè a l'a nen onta 'd paragonè n'onesta fia a 'na founna pèrdua.

GHIT. Ch'a dia: ch'a guarda com a parla, sala! Son pa pi soa serva, no adess, e i son capace 'd feme portè rispet da chionque. I son 'na fia com ass dev. Se Monssù Dësbèla a l'a 'ncora nen sposame, con 'l temp a më sposrà.

ALFR. (Basta che 'l divorssio a veña nen prima dle nosse!) (*ridendo, e con ironia*) Andoma, andoma: gavomie l'incomod. I penso che la tota a sarà trop ocupà pèr podeisse incarichè dle ordinassion, e d'ii travai ch'i jero vnù dsora pèr deje.

ANG. L' ton che chiel a dovra con mi, a l'è talment insoportabil, che contra mia veuja i son sforssà a feje 'na risposta. L' om che, dop avei butà ant la miseria n'onesta famia, a ven ancora a

insultela, a meprisela ant soa ca, a l'è 'd pi
che trist, a l'è 'n vil!

ALFR. (*con impeto*) Tota! (*crollando la testa e ridendo*)
Che folia! J era già quasi pèr fe cas dle ciance
'd 'na founna.

GHIIT. Andoma 'n poch: stoma nen si a fesse cativ
sangh.

ANG. Ch'a vado tranquii, coul pericol li 'a jè pi nen.

ALFR. A son cose da rie. (*si avvia*).

ANG. A vnirà 'l temp ch'a saran da piorè.

MERL. (*esce in questo punto dalla sua camera, Ha la barba
lunga, è pallido e macilento e si sostiene con
un bastone. Sorpreso al vedere Alfredo e Ghitin,
si ritira dietro il paravento, assistendo in di-
sparte alla scena*)

GHIIT. Ch'a piora chila, ch'a n'a pi 'd rason.

ANG. Im vèrgogno solament a scouteje.

GHIIT. (*sogghignando con malignità*) Ass vèrgognava
nen, eut meis fa, quand a vnisia a trovè Al-
fredo a neuv ore 'd matin.

ANG. Ah! (*indicando la porta*) Fora 'd mia ca!

GHIIT. A l'è inutil ch'a sè scauda. Alfredo a l'è me.
Monssù Dësbèla i lo dësbèlo mi. Chila, ch'a
guarda, (*facendo l'atto*) a peul suesse la boca.
(*via con Alfredo*).

ANG. (*oppressa dalla pena, cade a sedere*) Ma a la fin
d'ii cont, cos' i l'aine mai fait pèr esse punia
così ingiustament? (*si alza come colpita da un
pensiero*) Ah! mio Dio.... E papà?... Se coule

parole a fusso arivaje a j orie! (*mentre si volta si trova faccia a faccia con Merlati*) (Son pèrdua!)

MERL. (*freddo e severo, cercando di calmarsi*) Chi ch'a jè surtie da si drinta?

ANG. (*annientata, articolando appena*) Ghitin, la serva ch'i l'avio.

MERL. Ant coul lusso?

ANG. Monssù Dësbèla a la compagnava. A l'è soa founna, soa amia.

MERL. (*con impeto*) Chi? Coul infame? E i l'ai nen conossulo!

ANG. Papà, pèr amor di Dio, tranquiliste! Scoutme, pensa ch'it seurti adess d'an maladia.

MERL. (*frenandosi a stento*) Cosa ch'a sèrcava ant mia ca?

ANG. A son falisse, cioè no. Quaich pèrsoña a caso, senssa die 'l me nom, a l'a mandaje sì pèr ordineme 'd travai.

MERL. Ti però 't lo conossii già coul gran om? T'eri già 'n relassion?

ANG. L'avia incontralo doi ani fa ant un bal 'd famia, dov'a l'avia mname mia magna.

MERL. (*con amarezza e ironia*) A maravia! T'as 'na memoria ben felice!... A smia incredibil, che dop aveije forse balà 'nsem des minute, t'abii mai dësmentialo: so nom, soa figura a sio sempre state tanto present al pensè. Ma lon ch'a smia pi 'ncredibil ancora a l'è, che coula

përsoña, dop avei causà la ruiña dël pare, a l'abia 'l drit ancora dē vni sī drinta con 'na founna 'd coula specie, a ingiurieme la fia. Angeliña! mi tramolo a interroghetē. Parla: conta la vrità, ch'i sapia almeno s'i peuss ancora 'mbrassete pēr mia fia, o s'i devo invece maledite pēr sempre.

ANG. No, papà! Scoutme, it lo ciamo pēr carità!

MERL. (*siede come privo di forze*) Parla.

ANG. Una seira, ben disgrassià pēr mi, i l'ai vèdù Alfredo la prima volta. A l'era ant un bal, com i l'ai dite; ant un bal, dove le ilusion dla vita ass presento sot l'aspet 'l pi bel. Inesperta dël ben e dël mal, i l'ai chërdù vere soe parole, sincer i discors ch'am fasia, e tnù pēr bon i giurament d'un om fint e pervers; e lon ch'a forma mia colpa, pēr n'ann 'd seguit, senssa confideilo a me pare, i l'ai custodì ant me cheur 'l segret d'un amor 'l pi viv, 'l pi pur, 'l pi apassionà. Un dì finalment, coul om trist a s'è gavage la masera. Con 'na létera pieña d'espression le pi finte e le pi esagerà, a l'a invitame a vni da chiel, tratandsse, com a disia, dla soa felicità e dël so avni. Coula lètera a l'a fame caschè 'l vel ch'i avia dnans a jèui. Un'ora dop n' autra létera a l'a portà 'l disordin ant nostra ca, la disperassion ant to cheur. Dop un'infinità 'd scene dolorose, dop 'na neuit passà davsìn a to let, senssa ri-

flete 'l cativ pass ch'i fasia, son surtia da ca, a la matin, pèr andè a bate a soa porta, con 'l proponiment 'l pi ferm 'd decidlo a ciameme soa founna, o a chitelo pèr sempre.

MERL. (*coprendosi la faccia colle mani*) Ah! imprudenta.

ANG. Imprudenta, mata, t'as propi rason: ma almeno me amor a l'è spari, pèr lassè 'l post al pentiment e al dispress.

MERL. (*si alza tremando*) Al pentiment? Donque, Angeliña, 't ses pi nen degna 'd guardè an faccia to pare!? To onor...

ANG. Me onor a l'è senssa macia, i lo giuro!

MERL. (*le stringe convulsivamente la mano*) Sì: giurme, giurme pèr la memoria 'd toa mare, che to onor a l'è salv. Allora it chèrdrai. I l'ai bsogn 'd chèrdlo.

ANG. Sì, i lo giuro 's coula santa memoria! E s'a l'è nen vera lon ch'i dio, che la maledission 'd mia mama ass unissa a la toa.

MERL. No! Basta: it chèrdo e it pèrdoño.

ANG. (*gettandosi nelle braccia del padre*) Oh! papà. Adess i sento ch'i son torna felice.

MERL. (*stringendola al petto*) I t'm resti mach ti, mia povra creatura! Cosa ch'i faria sol? I saria pa pi 'd gnun.

ANG. Consolte, Nostsgnor a l'è giust. Speroma.

MERL. Ch'a spera, ch'ass consola. Eco lon ch'am dio tuti da eut meis a sta part. Fratant i sento

che mia salute a l'è andaita, mie forsse am
manco tuti i dì 'd pi, im avsiño a la mort
senssa 'na consolassion, l'unica ch'ii ciamo a
Dio, coula 'd vëde ancora 'na volta me fieul,
'l me povr Gioachin, che përr causa mia a sarà
mort sul fior dl'età, là sul camp 'd bataja. Ah!
coul dolor i peuss pi nen soportelo....

ANG. E përchè desperesse 'd coula manera?... Tute le
speransse a son pa 'ncora përdue. A peul esse
feri, esse stait pià përrsonè; da 'n moment a
l'autr a peul ariveje 'd soe neuve, 'na létera,
forse anche chiel.

MERL. Chiel? Oh! s'a fussa vera. Ma purtrop Gioachin
i lo vëdroma mai pi!

(*Voce di Gioachin di dentro in lontananza*) Papà! An-
geliña! Papà!

ANG. (*sbalordita, con un grido di gioia*) Oh! papà,
l'asto sentì? Coula vos...

MERL. (*precipitandosi verso la comune*) Oh! mio Dio...
A sariilo possibil?

Scena Quarta

GIOACHIN da ufficiale dei bersaglieri, in uniforme di fatica, col braccio sinistro al collo, fasciato e sostenuto da un fazzoletto di seta nera, sul petto la medaglia al valor militare, e detti.

GIOA. (*dal fondo correndo ansante*) Papà! Angeliña! i son mi!

MERL. Me fieul!... Viv!... Ah! Gioachin... (*si abbracciano con trasporto*).

ANG. Me fratel! E mi? E toa Angeliña?

GIOA. Dco ti, dco ti, cara sorela. (*abbraccia Angelina*).

MERL. (*piangendo di gioia stringe al seno con slancio ed affetto i due figli*) Tuti doi, tuti doi sì ant ii brass 'd vost pare. Cousta consolassion almeno a l'an nen podumla robè.

ANG. (*colpita e con dolore accorgendosi della ferita di Gioachin*) Gioachin! Povra mi! 'T ses ferì? Coul brass?...

MERL. (*con premura, turbandosi*) Ferì? Ferì? Me pover fieul! E mi ch'it sarava, ch'it strensia! Scusme, pèrdonne s'i l'ai fate sufri.

GIOA. Ma niente d'autut.

ANG. L'asto 'd mal gross? Sesto an pericol? Parla.

GIOA. No, no. Sburdive nen, a l'è niente. L'afè a podia fesse pi serio, ma 'na cura pronta e l'operassion ch'a l'an fame a l'an, ass peul disse, resti-

tuime 'l brass, che senssa dubi i l'avria përdù pë'r sempre. Un brav dottor, al qual i devo 'na riconossenssa eterna, a l'a fait so possibil pë'r salveme, e a l'è riussie.

MERL. T'avras sufert tant?

ANG. Me povër Gioachin!

GIOA. Figurevel... A l'an dovume gavè set scaje 'd mitraja, ch'i l'avia vsin a l'oss.

MERL. Oh! povra creatura. E di ch'a l'è pë'r mi!

GIOA. A l'è pë'r ti, sì, ch'i l'ai podù savei lon ch' a l'è la gloria; pë'r ti ch'i l'ai cousta medaja slè stomi e le spaliñe da tenent.

MERL. La medaja al valor!

ANG. Le spaliñe!

GIOA. Sì, tut loli i lo devo a la nostra disgrassia, ch'i benedisso ant coust moment, se pë'r causa soa i l'ai combatù pë'r la libertà e l'indipendenssa d'Italia, dacant al Re 'l pi bon e 'l pi valoros.

MERL. E disme 'n poch: t'as pa mai dësmentiane?

ANG. 'T pensavësto a noi?

GIOA. Sempre, i me cari! 'L vost pensè a l'era mia guida, vostra memoria 'l me angel custode. Quindes di fa, a San Martin, dnans al canon, a la mitraja, a la mort, i vëdia, com an seugn, tre care e bele figure: la toa, papà; la toa, sorela, e coula 'd povra maman, ch'am guardava contenta, e a smiava ch'am dieissa: va anans con corage, tranquil e sicur: la toa vita a sarà rispetà, përchè a l'è necessaria pë'r coui

ch' a tē speto lagiù an piorand. Con coula pèr-
suasion, con coula vos ant 'l cheur j era sem-
pre fra i primi; i me compagn am cascavo
davsìn com le mosche, e mi ananss con i pi
coragios. Arivà 's coula autura teribil, senssa
fià, an mes ai crii d'ii moribond, 'na muraja 'd
corp uman a n'impedia 'l passage; le bale, pi
spesse dla tempesta, a subiavo a jorie; la mi-
traja an decimava, jero quasi pèr cede, pèr-
chè la posission a l'era trop formidabil, e le
forsse, ch'i l'avio contra, tre volte pi grosse.
Ma, ant coul moment 'd pericol, 'd dubi e
d'esitassion a s'è sentisse 'na vos ch'a criava:
« Fieui! corage! Pioma San Martin, sednò an
toca fe San Martin a noi autri. » A l'era la vos
dèl Re, che, com l'ultim d'ii so soldà, a esponia
la soa vita, i so di, tant pressios a l'Italia. Coul
crii a l'a fait l'efet 'd 'na splua 'd feù ant un
baril 'd pouvèr. Ant un moment, con le bajo-
nète an cana, a corp a corp, con 'na forssa
e 'n corage da lion, an mes ai montruch 'd
mort, an mes al sangh ch'a coria, la posis-
sion a l'è staita nostra; j Alman a scapavo a
precipissi, e la bandiera tricolor a l'era piantà
'n sul ciochè 'd San Martin.

MERL. Oh! Gioachin: che pericoi, che moment t'as
passà!

ANG. A sarà anlora ch'it saras stait ferì?

GIOA. Tut da prinsip con 'l sangh bujent a col i son

quasi gnanca acorsumne; i sentia nen 'l mal e i seguitava a dè 'd bòte; ma apress, lon ch'ì l'ai sufert i son mach mi ch'ì lo sapia. I regreto però niente, i l'ai dësmentià tut. Lon ch'ì desidero mach, a l'è 'd guari ben prest, pèr podei esse 'n caso 'd finì la partia.

MERL. Come? La partia?

GIOA. Chèrdve forse che la pas ch'a s'è fasse a l'abia da durè? No, no: tuti unì e tuti liber. Pèr guadagnè la lite ai veul ancora doi bon avocat: la bajonèta e 'l canon.

MERL. Ah! no. Dio vèuja che tut a s'arangia a le boñe. La fortuna ch'a l'a salvate 'na volta, a podria abandonete, e to pare a dovria meuire 'd disgust!

ANG. Oh! ma guarda, Gioachin: pèr 'l piasì 'd vèdte e d'ambrassete, i l'ai fiña pèrdù la testa. L'ai ancora gnanca ciamate cosa ch'it veuli, 'd cosa ch'ì t'as bsogn.

MERL. Malavi com a l'è!

GIOA. I l'ai bsogn 'd niente. Pi tard.

ANG. E perchè?... 'T ses ben mach arivà adess?

GIOA. Sì, da Milan, con un conveui 'd ferì.

MERL. Fete viagè malavi, con un brass ant coul stat!

GIOA. Son reuse e fior, me car. Ai n'a jè 'd coui ch'a fan franch compassion. Bsogna fe 'd post a j autri.

MERL. Pèrchè tnine an tanta agitassion, ant una peña paria?

ANG. Ste tant temp senssa scrive?...

GIOA. Ma couma?... J eve nen ricevù la mia létera?
Adess i capisso vostre lacrime, vost stupor,
ch'i savia nen spiegheme.

MERL. L'ouma ricevù niente.

Scena Ultima

GATIN allegro, con una lettera, e detti.

GAT. (*entra in scena gridando*) Boñe neuve! boñe neuve! (*attonito vedendo Gioachin*) Gioachin!?

GIOA. Monssù Gatin, n'ambrassada!

GAT. E 'n basin 'd tut cheur! (*si abbracciano e baciano*) Vëdla (*ad Angelina*) che 'l dil mamlin a l'a nen mincioname?

ANG. Bravo, bravo! A l'avia rason stamatin.

GAT. Ch'a guarda: mi portava la létera e 'l grivoè a l'è già sì...

ANG. Con la midaja e le spaliñe!

GAT. Im na ralegro.

MERL. (*sospirando*) E 'n bras fracassà!

GAT. Im na ralegro pi nen.

GIOA. Ma come? Mia létera a l'a butaje dodes di d'an Lombardia a vnì a Turin?

GAT. A son miraco ch'a suceso sovens ant j ufissi dla Posta.

ANG. (*guardando la lettera*) 'T podii feje l'indiriss dla ca.

GIOA. Oh! L'ai dësmentià fiña 'l numer dla porta. E peui i savia ch'i andasii sempre a pieje a la Posta.

GAT. Di, brava gent: ste pura alegher, ch'i l'ai 'na boña neuva da deve. A l'è propi la volontà 'd Nostsgnor che ancheui a l'a unive.

MERL. Cos'asto da dine?

ANG. Ch'a conta, ch'a conta. Ancheui mē stupisso pi 'd niente.

GAT. 'L fieul a l'è tornà a ca, e le trantesinch mila lire a torno vni a to servissi.

MERL. (*sorpreso*) Cosa diesto, Gatin?

GAT. T'arcordësto lon ch'i t'ai prometute 'n meis fa?

MERL. Im n'arcordo.

GAT. T'as passame 'na procura an tute le forme...

MERL. Për fe i pass, che mia salute e 'l me stat am përmëtio pi nen 'd fe. Për guardè 'd salvè quai-cosëtta e 'd nen perde tut 'd pianta.

GAT. (*battendo le mani e ridendo*) Eben, tut a l'è salvà, a jè niente 'd përdù.

MERL. (*che dubita ancora*) Gatin: s'a l'è nen vera, përcarità, disëmlo nen!

ANG. A saria 'na crudeltà.

GIOA. Un disingann trop doloros.

GAT. Ma seve mat antra tuti? Veuli ch'im pia 'l piassi dë vnive a contè 'd fandonie? Vëdve nen ch'i son gnanca 'ndait a l'ufissi përc la pressa 'd coure a deve la neuva?

MERL. Ma cos'elo? Parla.

ANG. Ch'a dia prest.

GAT. La Cort stamatin a l'a prononssià la sentenssa, le firme a son considerà tute valide, e le ipoteche ecelente. Monssù Dësbèla a l'è stait condanà ant le speise, con 'l mandato d'arest; Fausëtta 'n contumacia, a des ani 'd reclusion. To credit a l'è riconossù pienament, a jè 'd bon da paghete, it ritiri i to dnè, e a comenssa d'ancheui la punission d'ii birbant. 'L dispacc a l'è finì.

MERL.

GIOA.

ANG.

} Possibil!?

GAT. Tanto possibil ch'a l'è vera.

MERL. (*grandemente commosso*) Gatin: fin adess it considerava com 'l mei d'ii me amis, adess it ciamrai 'l me benefator.

GAT. Ma niente d'autut.

GIOA. Gatin, ch'a la toca sì; a l'è propi 'l re d'ii galantomini.

ANG. 'L nost salvator.

MERL. Mia gratitudine a sarà eterna.

GIOA. Eterna l'amicissia.

GAT. (*ad Angelina*) Ch'a senta che elogi ch'am fan? E chila, tota, l'ala niente da dime?

ANG. Mi an ricompenssa ii strenso la man, (*abbassando gli occhi*) lon ch'a veul di tante cose.

GAT. Oh! tota Angeliña, i la ringrassio: sta volta finalment i l'ouma finì pèr capisse.

MERL. E ti, pover Gioachin, toa carriera a l'è andaita.

GIOA. Cosa diësto mai? A comenssa mach adess, brila e felice.

GAT. Invece dla piuma e dla retorica a dovrerà la spa e la carabiña. A guadagnrà pi gnuñe cause, ma a peul vni general.

ANG. Ass faliss, Monssù Gatin. A l'a guadagnà la causa pi nobil e pi bela, la causa dla libertà; e coula medaja ch'a porta slë stomi a l'è la ricompenssa, e la memoria la pi gloriosa, pèrchè a preuva ch'a l'a concorù con so sangh a fe restitui i beni e la vita, nen mach a n'individuo, ma a tuta 'na nassion! (*Cala il sipario*).

Proprietà M. Solari

Fine della Commedia.

PROPRIETÀ DI
RINETTI P. UNATO
Via Berthollet N. 16
TORINO

Proprietà
TEATRO COMICO

Solari
IN DIALETTO PIEMONTESE

DI

FEDERICO GARELLI

Volume Nono

DANIEL 'L MACHINISTA

COMMEDIA IN 3 ATTI



TORINO 1876

STAMPERIA GAZZETTA DEL POPOLO

utti i diritti riservati (Legge 25 giugno 1865, n. 2337)

L'Autore avendo soddisfatto agli obblighi imposti dalla legge 25 giugno 1865 agli Autori d'opere d'ingegno, dichiara: che nessun Capo-comico, Direttore di Compagnia drammatica, Artista o Società filodrammatica qualsiasi, può competere il diritto di rappresentare questa Commedia, senza una sua particolare autorizzazione; che egli tiene responsabili dell'infrazione disposta della legge le autorità presso le quali per la legge stessa esistono gli uffici dei *Diritti d'Autore*.

I Capi-comici e le Società filodrammatiche che desiderassero rappresentare la presente Commedia, si rivolgano per le trattative e relativa autorizzazione all'Autore, stenografo alla Camera dei Deputati in Roma.

ALL' ILLUSTRE PROF. E PUBBLICISTA MONREGALESE

COMM. CASIMIRO DANNA

Allorchè assisi sotto il pergolato
Della tranquilla cara sua villetta,
Tra il sorriso dei campi e del creato,
Colla gentil famiglia sua diletta,
Passammo quest'autunno un dì beato,
D'arte parlando e d'ogni cosa eletta,
Le accennai che avrei poscia dedicato
A Lei codesta scenica operetta.

La promessa mantengo, e benchè sia
Povera cosa e scritta lì per lì,
L'accetti coll'usata cortesia.

Il chiaro nome suo stampato qui
Molto mi onora, ed io per parte mia
Venero in Lei la scienza e Mondovì.

Roma, 12 novembre 1875.

PROPRIETÀ di
RINETTI FORTUNATO

Via Berthollet N. 16

TORINO
